



Foreign
Investors
Council

VSI NOVOSTI

Januar - Juni 2015



Foreign
Investors
Council

VSI NOVOSTI

Izdavač:

VSI - Vijeće stranih
investitora

Uredništvo:

Bojana Škrobić Omerović
izvršni direktor

Tea Kajan
asistent

Lektor:

Ured VSI

Dizajn, DTP, štampa:
Triptih, dizajn studio

Iz sadržaja

VSI Novosti

- Radni sastanak na temu: Propisi o tekućim naftnim gorivima u BiH i njihova usklađenost s propisima Evropske unije
- Regionalna konferencija Borba protiv sive ekonomije: Neophodnost za investicije u Jugoistočnoj Evropi
- Okrugli stol "Pričajmo o ekonomiji"
- Na korporativnom susretu članova Predstavništva njemačke privrede (AHK) i Vijeća stranih investitora u BiH (FIC) podcrtna neophodnost provođenja ekonomskih reformi

VSI Predstavlja

- Coca-Cola HBC B-H d.o.o. Sarajevo
- Petrol BH Oil Company d. o. o. Sarajevo
- Philip Morris BH d.o.o.
- KRUPA KABINE d.o.o.

Intervju sa...

- Jelica Grujić, direktorica Agencije za unapređenje stranih investicija u Bosni i Hercegovini (FIPA)

Aktivnosti članova VSI

- Konferencija "Politika zaštite konkurencije na putu pristupa EU"
- Održani BOSCH Dani otvorenih vrata
- WOLF THEISS već 10 godina podržava strana ulaganja u BiH

Usvojena legislativa u BiH

- Službeni glasnik Bosne i Hercegovine
- Službeni glasnik Republike Srpske
- Službene novine Federacije Bosne i Hercegovine

Ekonomski pregled za BiH

- BIH EKONOMSKI UPDATE: Brojke iz marta ukazuju na ekonomski oporavak
- EKONOMSKI FOKUS: Trgovinska bilanca u prvom kvartalu 2015. godine

VSI

Fra Anđela Zvizdovića 1/B11, 71 000 Sarajevo, BiH
Tel/Fax: +387 33 295-880, Fax: +387 33 295-889
info@fic.ba, www.fic.ba

Riječ Predsjednika VSI/SSI

Poštovane kolege, partneri, dame i gospodo;

Predstavljamo vam peti broj FIC Novosti Vijeća/Savjeta stranih investitora Bosne i Hercegovine za period januar – juni 2015. godine.

Kao i do sada, ovim putem želimo vas informirati o događajima koji su iza nas, ali i relevantnim temama od značaja za strana ulaganja.

Retrospektivnim osvrtom, godina iza nas nije bila u znaku pozitivne atmosfere. Štaviše, brojne analize, te dugo čekanje na formiranje vlasti, opet su poljuljale političku sliku o BiH, koja je preduslov za strana ulaganja. Godina je započela mirno, čak bi rekli stagnirajuće, čekajući da se određene stvari počnu rješavati u pravcu ekonomskih reformi. Nove vlade, koje su formalno započele mandat početkom proljeća, obratile su se javnosti pune entuzijazma i velikih planova za investicije. Tome je prethodila jedna važna inicijativa, tj. prekretnica za EU tokove u BiH, a to je njemačko-britanska inicijativa, koja je rezultirala i aktiviranjem Sporazuma o stabilizaciji i pridruživanju BiH (SSP).

Stranački lideri u BiH, prihvatili su jednoglasno ovu inicijativu i zauzeli jedinstven stav da je BiH spremna sprovesti reforme kako političke, tako i ekonomske, a sve sa ciljem poboljšanja poslovanja, ali i svakodnevnog života bh. građana.

Kada su u pitanju ekonomski pokazatelji u BiH, sredina mjeseca maja 2015. prijatno je iznenadila javnost, jer je Centralna banka BiH objavila zvaničan podatak da su u 2014. godini ukupna strana ulaganja iznosila 819 miliona KM. Prema preliminarnim podacima za 2014. godinu, regionalno posmatrajući, najveći iznos ulaganja registrovan je u Hr-

vatskoj, koja je imala i najveći rast investicija u poređenju sa 2013. godinom (291.3%). Investicije u Hrvatskoj u 2014. godini su iznosile 2,876 milijarde EUR, što je najveći godišnji iznos još od početka ekonomske krize. U prvih devet mjeseci 2014. godine u Srbiji je registrovano 1,153 milijarde EUR stranih investicija, što je za 49.9% više nego u 2013. godini. Ovo nam je poruka koju ne smijemo ignorisati, da zemlje iz okruženja koje se također bore sa sličnim problemima, ipak uspijevaju privući više investicija, značajno više, nego BiH.

Zanimljivi su i podaci na osnovu izvještaja "Aftercare" programa za strane investitore, kojeg sprovodi FIPA u saradnji sa IFC-om, gdje se poslovno okruženje opisuje na sljedeći način:

"Na osnovu ograničenih uzoraka, 70.8% kompanija ocjenjuje poslovno okruženje u BiH kao dobro, dok je 25% odgovora ocijenilo poslovno okruženje kao loše. Kao vrlo loše, poslovno okruženje su ocijenile dvije kompanije ili 4.2%, a na žalost niti jedan odgovor nije ocijenio poslovno okruženje u BiH kao vrlo dobro."

Kao što je već dosta puta rečeno, dokazano, napisano, osnovni problem čini neadekvatna administracija, podijeljenost zemlje na administrativne i teritorijalne jedinice, a samim tim i nepostojanje jedinstvenog ekonomskog tržišta na cijeloj teritoriji BiH.

Najveću nesigurnost, za investitore i sada problem broj jedan predstavljaju tumačenje i različita primjena propisa, ovisno od slučaja do slučaja, od institucije do institucije. Tako i zbog toga, dobijanje dozvola od strane nadležnih organa predstavlja skoro pa nemoguću misiju, gdje investitore gube vrijeme i novac. Uspo-



BRANIMIR MUIDŽA, Predsjednik VSI/SSI BiH

stavljanje jedinstvenog mehanizma koordinacije na teritoriji BiH i u okviru institucija ali na samom tržištu, te povezivanje BiH ekonomije sa regionalnim, a da ne govorimo EU tokovima, je prioritet novih vlada. Sada nam je pružena prilika i nadamo se da će biti iskorištena.

Vijeće stranih investitora BiH se i dalje zalaže za partnerstvo sa vladom. Smatramo da naši investitori koji su uložili u BiH, predstavljaju najbolje promotore ulaganja, oni su istinski poslovni ambasadori i dokazano je da jedan zadovoljan dovodi još tri investitora za sobom. U toku je priprema nove "Bijele knjige" za period 2014/15 godine. Podsjetimo, Bijela knjiga je najvažniji pisani produkt VSI/SSI i kao takva specifična je što njene preporuke dolaze direktno od kompanija, preporuke koje se tehnički vrlo lako provode u praksi i koje bi uveliko popravile poslovnu klimu. Kao dio paketa EU Sporazuma za rast i zapošljavanje u BiH, naše preporuke su ušle i u briselske dokumente sa ciljem da učinimo platformu za investiranje primamljivom.

U nastavku ovog biltena, pogledajte šta smo sve uradili u proteklih 6 mjeseci i koji su budući projekti VSI/SSI. Koordinacija i saradnja sviju sa svima, te neometan pristup tržištu i evropska perspektiva su i dalje u fokusu naših aktivnosti.

S poštovanjem,

BRANIMIR MUIDŽA

Predsjednik VSI/SSI BiH

Zadnji sastanak Vijeća za suradnju (CC) u 2014. godini

Jedanaestog decembra 2014. godine, u Sarajevu, VSI BiH je održalo posljednji sastanak Vijeća za suradnju u 2014. godini. Tema ovog sastanka bila je ekonomska diplomacija Bosne i Hercegovine.

Gost predavač na sastanku je bio Neven Kulenović, voditelj Odjela za ekonomsku diplomaciju u Ministarstvu vanjskih poslova BiH.

Kulenović je kratkom prezentacijom informirao učesnike sastanka o djelokrugu rada Odjela za ekonomsku diplomaciju, kao i o glavnim aktivnostima ovog odjela. On je, također, prikazao pregled



najvećih BiH trgovinskih partnera u 2013. godini. Kad je riječ o uvozu, BiH je ostvarila najveći promet sa Hrvatskom, Njemačkom, Rusijom, Srbijom i Italijom. U 2013. godini, iz BiH se najviše izvezilo u Njemačku, Hrvatsku, Italiju, Srbiju i Austriju.

Nakon njegovog izlaganja, članovi Vijeća za suradnju, predstavnici međunarodnih udruženja i stranih ambasada u BiH imali su veoma konstruktivnu, interaktivnu raspravu o pitanjima vezanim za razvoj ekonomske diplomacije u BiH i njenim trenutnim kapacitetima. ■

Zakon o izmjenama i dopunama Zakona o politici direktnih stranih ulaganja u BiH stupio na snagu

Zakon o izmjenama i dopunama Zakona o politici direktnih stranih ulaganja u Bosni i Hercegovini je objavljen 16. marta 2015. godine u Službenom glasniku BiH 22/15. U konsultacijama o izmjenama i dopunama ovog zakona sudjelovali su predstavnici Vijeća stranih investitora BiH.

Izmjene predviđaju da "strani ulagač ima pravo investirati, te zatim ponovno investirati dobit tih ulaganja u bilo koji sektor gospodarstva Bosne i Hercegovine u istom obliku i pod istim uvjetima definiranim za stanovnike Bosne i Hercegovine i poštivajući postojeće zakone i propise BiH, entiteta i Brčko Distrikta BiH". Direktna strana ulaganja će biti oslobođena plaćanja carinskih pristojbi, ukoliko nije drugačije propisano odredba-



Godina XIX Ponedjeljak, 16. marta/ožujka 2015. godine	Broj/Број 22	Година XIX Понедељак, 16. марта 2015. године
--	------------------------	---

ISSN 1512-7486 - bosanski jezik
ISSN 1512-7494 - hrvatski jezik
ISSN 1512-7508 - srpski jezik

PARLAMENTARNA SKUPŠTINA BOSNE I HERCEGOVINE

164

Na osnovu člana IV. 1. a) Ustava Bosne i Hercegovine, Parlamentarna skupština Bosne i Hercegovine, na 73. sjednici Predstavničkog doma, održanoj 25. septembra 2014. godine, i na 2. sjednici Doma naroda, održanoj 5. marta 2015. godine, usvojila je

ZAKON O IZMJENAMA I DOPUNAMA ZAKONA O POLITICI DIREKTNIH STRANIH ULAGANJA U BOSNI I HERCEGOVINI

Član 1.
U Zakonu o politici direktnih stranih ulaganja u Bosni i Hercegovini ("Službeni glasnik BiH", br. 17/98, 13/03 i 48/10), u članu 2., u izrazu "Rezident Bosne i Hercegovine", iza riječi "entiteta" dodaju se riječi: "ili Brčko Distrikta Bosne i Hercegovine".

Izraz "Javno informiranje" zamjenjuje se izrazom "Medijski poslovi" i glasi: "Medijski poslovi" su poslovi emitiranja radijskog programa i emitiranja televizijskog programa putem samostalne radiodifuzije."

ma Zakona o carinskoj politici. Preporuke iz Bijele knjige VSI-a koje predviđaju ukida-

Član 3.
U članu 4. stav (a) mijenja se i glasi:

"(a) Bez obzira na politiku slobodnih direktnih stranih ulaganja u Bosni i Hercegovini utvrdjenih u članu 3. ovog zakona, strani ulog u osnovnom kapitalu nekog poslovnog subjekta koji se bavi proizvodnjom i prodajom oružja, municije, eksploziva za vojnu upotrebu, vojne opreme i medijskim poslovima neće preći 49% osnovnog kapitala u tom poslovnom subjektu."

U stavu (b) riječ "saglasnost" zamjenjuje se riječju "odobrenje".

Stav (f) mijenja se i glasi:
"(f) Vlada entiteta može donijeti odluku, ukoliko ocijeni opravdanim, da ulog stranog lica kod određenih privrednih društava iz stava (a) ovog člana, ne podliježe restrikciji navedenoj u stavu (a) ovog člana, a sve u skladu s propisima kojim su regulirane ove oblasti."

Član 4.
U članu 8. stav (a) riječi: "i sa zakonima entiteta" zamjenjuju se riječima: "te sa zakonima entiteta i Brčko Distrikta Bosne i Hercegovine".

nje određenih ograničenja za strane investicije u medijima su uključene u novi zakon. ■

Radni sastanak na temu: "Propisi o tekućim naftnim gorivima u BiH i njihova usklađenost s propisima Evropske unije"

Sastanak je organiziralo VSI BiH uz značajnu podršku EU Delegacije u BiH s ciljem definiranja boljih propisa za sektor goriva i tekućih goriva. Budući da je naša zemlja na putu ka SSP, želimo naglasiti važnost reforme određenih sektora. Predstavnici ministarstava i inspektorata, koji su nadležni za ovo pitanje, raspravljali su o implementaciji pravnih propisa na terenu sa predstavnicima kompanija. Ovo je dobar način komuniciranja sa

poslovnom zajednicom kako bi zakone održali stabilnim, a investitore zadovoljnim. Cilj ove radionice bio je razviti dijalog između institucija nadležnih za ovaj sektor, dobavljača i drugih energetskih subjekata, te raspravljati o problemima i nedoumicama u praktičnoj primjeni zakona i drugih propisa, što uključuje sljedeće:

- Usklađenost propisa o tečnim naftnim gorivima unutar BiH, te usklađenost istih sa EU legislativom;

- Utvrđivanje usklađenosti kvaliteta, obim uzorkovanja i troškovi izvođenja monitoringa kvaliteta tečnih naftnih goriva i LPG-a;
- Standardi kvaliteta tečnih naftnih goriva;
- Označavanje naftnih goriva na pumpnim automatima, i promet aditiviranih naftnih goriva.

Učesnici sastanka su dogovorili nastavak ovih aktivnosti, uključujući nivoe RS-a i BiH. ■

Susret predstavnika VSI i drugih poslovnih udruženja u BiH sa predstavnicima Uprave za indirektno oporezivanje (UINO) s ciljem raspravljanja o problemu usvajanja novog Uputstva o pojednostavljenoj izvoznjoj proceduri

Zajednički zaključak sastanka je da će UINO i poslovna udruženja u BiH zajedno raditi na rješavanju ovog problema. Dodatno će se razmotriti mogućnost da kompanije (izvoznici) uključe samo robu koja se proizvodi u BiH i izvozi van BiH, te da njen izgled i način pakiranja bude jasno prepoznatljiv u pojednostavljenoj carinskoj proceduri na graničnom prijelazu.

Iz UINO su najavili da u tom smislu očekuju konkretne prijedloge o CN kodovima samo za robu proizvedenu u BiH i koja se izvozi van BiH.

Na ovaj način, UINO će dodatno pružati podršku izvozno orijentiranoj domaćoj proizvodnji u skladu s važećim zakonskim procedurama. Prema tome, valjanost ovlaštenja izdanog



naknadno će se produžiti za vrijeme potrebno za izdavanje nove suglasnosti za pojednostavljenu carinsku proceduru po računu. Uputstvo o pojednostavljenom carinskom po-

stupku po računu je stupilo na snagu početkom ove godine, međutim, poduzetnici traže izmjenu upute u smjeru povratka na stanje koje je bilo prethodno pismenljivo. ■

Susret predstavnika VSI BiH i Sida USAID GOLD projekta s predstavnicima grada Banja Luka povodom izdavanja građevinskih dozvola u Banja Luci

Predstavnici VSI-a / kompanije članice su sa predstavnicima grada Banja Luka razgovarali o problemima s kojima se suočavaju investitori prilikom podnošenja zahtjeva za dozvole. Iako je grad Banja Luka poboljšao sustav izdavanja dozvola, još uvijek postoje problemi kad je u pitanju implementacija i koordinacija administrativnog dijela. Svjesni činjenice da investitorima trebaju učinkovite, brze i transparentne usluge, dogovorena je bliža saradnja u svrhu poticanja ulaganja. USAID predstavnik, Thomas Rojas šef gospodarskog odjela, izjavio je da će USAID programi i dalje pratiti preporuke Bijele knjige i aktivnosti VSI-a. ■



Održan otvoreni forum na temu: Sistem naplate i oporezivanje usluga zaštite intelektualne svojine, digitalnih sadržaja i telekomunikacijskih usluga u BiH

U organizaciji Američke trgovačke komore u BiH (AmCham) i Vijeća stranih investitora BiH u srijedu, 01.04.2015. godine u Banja Luci, održan je otvoreni forum na temu "Sistem naplate i oporezivanje usluga zaštite intelektualne svojine, digitalnih sadržaja i telekomunikacijskih usluga u Bosni



i Hercegovini" s ciljem pokretanja dijaloga o problemima sa kojima se susreću poslovni subjekti u ICT (Informaciono Komunikacijske Tehnologije) oblasti i oblasti zaštite prava intelektualnog vlasništva. Na događaju, koji je bio podijeljen u tri tematske cjeline, dat je osvrt na sistem naplate i oporezivanja usluga zaštite intelektualne svojine, poreski tretman digitalnih sadržaja i telekomunikacijskih usluga. Osim predstavnika kompanija – članica AmCham BiH i FIC BiH, o problemima su diskutovali i predstavnici UINO BiH, inspeksijskih organa i poreskih uprava.



"UINO BiH radi na izmjenama Zakona o PDVu i usklađuje isti sa preporukama EU. Prvi draft je gotov i ovom prilikom pozivamo poslovne asocijacije koje predstavljaju glas odgovornih investitora, da se uključe u daljnji rad izmjena legislative. Mi želimo partnerski odnos sa vama" – naglasio



je Dejan Radić, šef Grupe za kontrolu velikih poreskih obveznika u UINO BiH.

Potreba da se održi Otvoreni forum upravo na ovu temu proizašla je iz činjenice da je ICT sektor u BiH, trenutno najinteresantniji postojećim i budućim stranim investitorima, te da svojim potencijalom može doprinijeti ubrzanom ekonomskom razvoju Bosne i Hercegovine, uz direktno una-

prijeđenje i razvoj drugih privrednih sektora.

"Drago mi je da je upravo ova konferencija mjesto otvaranja novih pitanja ali i stvaranja konstruktivnog dijaloga, kako bi se donijele važne promjene za dobrobit svih nas. Svi zajedno treba da radimo na podizanju svijesti o upotrebi i distribuciji licenciranih softvera, oporezivanja digitalnih sadržaja i zaustavljanja korištenja ilegalnih informacijsko-tehnoloških proizvoda", istakao je Đorđe Mišić, izvršni direktor za marketing i prodaju kompanije M:tel.

Na Otvorenom forumu zaključeno je da je od bitne važnosti identifikovati oblasti u kojima poslovna praksa može predstavljati podršku dužnosnici-



ma poreskih uprava, inspekcijских uprava, Instituta za zaštitu prava intelektualnog vlasništva, te je važno pozicioniranje ICT sektora kao strateškog sektora vladinih strategija i planova, kao važnog za budući razvoj, ali i mogućnost dobijanja fondova za stimulaciju i ulaganja. Događaj je podržan od strane zajedničkog člana AmCham BiH i FIC BiH, kompanije M:tel. ■

Zajedničke aktivnosti s ciljem stvaranja boljeg okruženja za strane investitore

Teme sastanka na kojem su sudjelovali premijer Tuzlanskog kantona, Bahrija Umihanić, predstavnici Vijeća stranih investitora u BiH, predstavnici USAID-a i grada Tuzla bili su izgledi i potencijali za privlačenje novog razvoja i postojećih stranih investicija, te problemi i poteškoće s kojima se kojima se strani investitori suočavaju u Bosni i Hercegovini.

Predstavnici VSI su učestvovali na sličnim sastancima i u drugim kantonima, a zajedničke probleme za poslovanje stranih investitora predstavljaju administrativne prepreke, dobivanje potrebnih dozvola, politička i pravna nesigurnost, podjela nadležnosti između različitih nivoa vlasti, te poreski zakoni koji sužavaju opseg za razvoj poslovanja.

"Drago nam je čuti da je ova vlada napravila Strategiju razvoja, Registar administrativnih procedura i Vodič za stra-

ne investitore, te da je uzela u obzir preporuke iz Bijele knjige 2012/13. Dolazeća vlada može i dalje koristiti ove preporuke kao vodič u procesu reformi", rekla je Bojana Škrobić-Omerović, Izvršni direktor Vijeća stranih investitora. Predstavnici stranih investitora, Xella BH i Sisecam soda iskoristili su ovu priliku da pohvale rad, predanost i podršku Vlade Tuzlanskog kantona stranim investitorima, ali i da predstavne neke veće probleme s kojima se suočavaju.

"Obzirom da se većina tih problema mora rješavati na federalnom i državnom nivou vlasti, uvjereni smo da će Vlada Tuzlanskog kantona, u komunikaciji s drugim nivoima vlasti, učiniti sve u njenoj moći da potakne određene promjene", rekao je Emir Kadrić, direktor Xella BiH.

U prethodnom periodu Gradska uprava grada Tuzla je na-

pravila veliki pomak u radu i pokazala veliku posvećenost poduzetnicima i investitorima.

"Imenovali smo osobu odgovornu za pružanje podrške i pomoći investitorima, registrovat ćemo, te u najkraćem roku riješiti sve problem. Prilikom naše zadnje posjete investitorima primijetili smo da postoji dosta legislative koja se mora mijenjati na federalnom nivou kako bi se investitorima omogućili bolji uslovi za rad", rekao je Vedran Lakić, voditelj Odjela za razvoj, poduzetništvo i društvene djelatnosti u Upravi grada Tuzla.

U Tuzlanskom kantonu i dalje su vidljive posljedice loše privatizacije, česti su prosvjedi radnika, što u velikom mjeri sprečava priliv stranih investicija.

"Iskreno se nadam da će ovi otežavajući faktori uskoro nestati, te da će situacija biti povoljnija," rekao je premijer

Umihanić. On je zaključio da će Vlada Tuzlanskog kantona učiniti napore da promijeni kantonalne propise. "Također smo poslali veliki broj inicija-

tiva i prijedloga za izmjene i dopune propisa na federalnoj razini. Broj prepreka koje su uklonjene, kao i onih koje još uvijek postoje, će biti utvrđen

i prezentiran na sjednici Vlade koja će, nadam se, i dalje raditi na njihovom otklanjanju." ■

Regionalna konferencija "Borba protiv sive ekonomije: Neophodnost za investicije u Jugoistočnoj Evropi"

Predstavnici poslovne zajednice i institucija vlasti - ministri finansija, trgovine i ekonomskih odnosa kao i direktori poreskih i carinskih uprava iz sedam ekonomija regiona okupili su se na prvoj regionalnoj konferenciji pod nazivom *Borba protiv sive ekonomije, neophodnost za investicije u Jugoistočnoj Evropi* koja je održana 28. aprila 2015. godine u Sarajevu.

Organizatori konferencije su Sekretarijat Vijeća za regionalnu saradnju (RCC) i Vijeće stranih investitora BiH (FIC BiH) uz pokroviteljstvo Savjeta/Vijeća ministara Bosne i Hercegovine. Ključna pitanja i teme konferencije bave su dugoročnim uticajem na eko-



nomiju i mogućnosti zaštite i kontrole tržišta efikasnim i pravednim poreskim i carinskim politikama te politikama rada i tržišta rada.

Konferenciju je otvorio Predsjedavajući Vijeća ministara BiH Denis Zvizdić.

"Nesumnjivo da svaka od zemalja ima programe i politike suzbijanja sive ekonomije i da one djelimično donose neka

poboljšanja. Ali, mi smo i dalje daleko od standarda efikasne ekonomije, stoga ću biti sretnan ako današnja konferencija posluži kao primjer za ono što Bosna i Hercegovina mora hitno stvoriti - nacionalni plan za borbu protiv sive ekonomije. Vlada na čijem sam čelu bit će predana borbi protiv sive ekonomije i koristim priliku da naglasim da ćemo imati nultu toleranciju na sve nje-
ne pojavne oblike. Nadamo se podršci privrede, javnosti i međunarodnih institucija i pozivamo vas da pružite podršku Ministarstvu finansija i trezora BiH, koje će izraditi plan kojim ćemo Bosnu i Hercegovinu vratiti među uređene zemlje", naglasio je Predsjedavajući u svom uvodnom govoru.

Siva ekonomija prepoznata je kao jedan od najtežih izazova privrednom i ekonomskom rastu u Jugoistočnoj Evropi. Godišnji gubitak po BDP-u, po procjenama stručnjaka nadmašuje, u prosjeku, 30% za sve zemlje regiona.

"Važno je što su s nama danas ljudi koji su u biznisu, predstavnici privrede jer su oni najviše izloženi problemima. Siva ekonomija je ozbiljna smetnja za razvoj regiona, ukoliko se ona na vrijeme ne iskorijeni. Današnji skup je prvi u nizu onih koji organizujemo kako bismo započeli saradnju između vlada i predstavnika privrednog sektora na putu do zajedničkih rješenja. Do kraja dana, usvojit

ćemo zajednički stav kako da krenemo naprijed i uvjeren sam da ćemo time ostvariti svrhu ovog sastanka i da je to osnova na kojoj svi možemo da radimo zajednički", izjavio je generalni sekretar Vijeća za regionalnu saradnju Goran Svilanović.

Cilj konferencije je stvaranje platforme za saradnju na suzbijanju sive ekonomije i uspostavljanje mehanizma redovnih godišnjih sastanaka svih ključnih aktera. Tokom konferencije će biti dogovorena i agenda za borbu protiv sive ekonomije - jedne od ključnih prepreka za razvoj poslovne zajednice i zdraviju klimu za strane investicije u Jugoistočnoj Evropi.



"Borba protiv sive ekonomije je ustvari borba za ekonomiju. Sve kompanije, male velike i srednje koje plaćaju poreze, trpe štetu. Problem je globalan i sastali smo se na ovoj konferenciji da razmijenimo iskustva. Želimo sankcije za one koji ne poštuju zakon i želimo otkloniti administrativne barijere za investicije. Kada investitor sazna da mu za dozvolu treba 180 dana, on se okrene



i ode. Realizacijom preporuka koje smo ponudili, sužava se prostor za korupciju”, rekao je prilikom otvaranja predsjednik odbora direktora Vijeća stranih investitora BiH Branimir Muidža.

Agende Vijeća za regionalnu saradnju (RCC) i Vijeća stranih investitora BiH (FIC BiH), potvrđene dokumentima *Strategija Jugoistočne Evrope 2020 (SEE 2020)* RCC-a i *Bijele knji-*

ge FIC-a naglašavaju potrebu saradnje institucija vlasti i poslovne zajednice na stvaranju zdravog poslovnog okruženja, zaštiti svih aktera u poslovnim procesima – poslodavaca i radnika a posljedično i zaštite države kao temelja socijalne i ekonomske sigurnosti.

“Pozivam sve vlade da se bore protiv sive ekonomije. Ponovio bih apel da se ojača koordinacija zemalja koje su danas prisutne na ovoj konferenciji. Jasno je da sve institucije i agencije danas ovdje suočavaju sa istim problemima ali vjerujem da kroz saradnju, države u regiji vrlo lako mogu pronaći rješenja za borbu protiv sive ekonomije”, rekao je Goran Pekez, direktor korporativnih poslova za



regiju Adriatica Japan Tobacco International.

Sudionici konferencije bili su ministri finansija, trgovine ili ekonomskih odnosa kao i direktori poreskih i carinskih uprava iz sedam ekonomija regiona: Albanije, Bosne i Hercegovine, Hrvatske, Kosova, Crne Gore, Srbije i Bivše Jugoslovenske Republike Makedonije. ■

Okrugli stol “Pričajmo o ekonomiji”



Kao nastavak dijaloga na temu reforme poreskog sistema, u okviru programa “Promoviranje političke odgovornosti”, Centar za politike i upravljanje (CPU) organizirao je 12.03.2015. godine u Sarajevu okrugli stol “Pričajmo o ekonomiji”, sa posebnim na-

glaskom na kreiranju poreske politike u funkciji ekonomskog rasta i zapošljavanja.

Centar za politike i upravljanje je u uvodnom dijelu prezentirao istraživanje “Poreska politika u funkciji ekonomskog rasta i zapošljavanja”, dok je Mersiha Kurspahić, sekretar



Udruženja poslodavaca FBiH i Branimir Muidža, predsjednik Vijeća stranih investitora BiH govorio o najbitnijim stavkama u poreskoj reformi iz ugla poslodavaca, te predstavnik Porezne uprave FBiH koji je prezentirao perspektivu ove institucije povodom nužne poreske reforme. ■

VSI BiH i USAID - Prvi sastanak sa predstavnicima projekta Investiranje u sektor energije (EIA)

VSI BiH je bilo domaćin sastanka nedavno pokrenutog USAID projekta Investiranje u sektor energije - EIA. Predstavnicima ove dvije organizacije podijelili su informacije o aktivnostima i definirali model buduće suradnje. Prve dvije komponente ovog projekta su



potpuno u skladu s aktivnostima VSI BiH, s ciljem poticanja razvoja poduzetništva, kao uklanjanja administrativnih prepreka za ulaganja.

Energija, kao potencijal, usko je povezana s drugim administrativnim procedurama, kao što su izdavanje različitih dozvola, preklapanje ovlasti i

drugim, sličnim postupcima. Zaključak sastanka je bio da samo zajedno možemo ubrzati reforme s ciljem stvaranja boljeg poslovnog okruženja. ■

Okupljanje Vijeća za suradnju (CC) u 2015. godini

Prvo okupljanje Vijeća za suradnju koje egzistira pod krovom Vijeća stranih investitora BiH u 2015. godini održano je 19. svibnja 2015. godine u restoranu "4 sobe gospođe Safije" u Sarajevu. Tema sastanka je bila: "Stvaranje radnih mje-

sta kroz poticanje razvoja malog i srednjeg poduzetništva i Sporazum za rast i zapošljavanje". Članovi CC zaključili su da je BiH potrebno više poticaja za razvoj malog i srednjeg poduzetništva, te ulaganja i obrazovanja za zaposlenike.

Sporazum za rast će ponuditi novi pristup gospodarskih reformi usmjerenih na kreiranje više radnih mjesta i boljeg poslovnog okruženja. Članovi su također zaključili da je u svemu tome bitna i regionalna suradnja. ■

Uručena priznanja najznačajnijim stranim investitorima u BiH za 2014. godinu

Agencija za promociju stranih ulaganja (FIPA) izabrala je najznačajnije strane investitore u Bosni i Hercegovini u 2014. godini, a nagrade su dodijeljene u četiri kategorije: najznačajnija greenfield investicija, najznačajnija investicija na osnovu zajedničkog ulaganja, najznačajnija investicija putem privatizacije i najznačajnija investicija zahvaljujući kojoj je otvoreno najviše radnih mjesta. Nagradu za najbolju greenfield investiciju dobila je kompanija "Comsar Energy Group", koja je prošle godine investirala 5,3 miliona eura. Swisslion d.o.o. Trebinje dobio je nagradu u ka-

tegoriji najznačajnija investicija u otvaranju novih radnih mjesta. GS TMT (Tvornica mašina Travnik), kćerka firma kompanije GS iz Regensburga u Njemačkoj, dobitnik je nagrade za najznačajnijeg investitora u kategoriji investicije putem privatizacije.

U kategoriji najznačajnija investicija putem zajedničkog ulaganja pobjednik je firma Zinkteknik Bosnia d.o.o. Mostar. Manifestacija je okupila značajan broj predstavnika institucija, međunarodnih organizacija, akreditiranih ambasada, poslovne zajednice i medija u BiH. ■

Okrugli stol "Koordinacija aktivnosti u procesu privlačenja direktnih stranih investicija"

U ponedjeljak 01.06.2015. godine, Agencija za unapređenje stranih investicija BiH (FIPA) organizirala je okrugli stol pod nazivom "Koordinacija aktivnosti u procesu privlačenja direktnih stranih investicija".

Cilj ovog skupa bio je da se na jednom mjestu okupe predstavnici institucija koje učestvuju u procesu privlačenja direktnih stranih investicija u BiH i razgovaraju o unapređenju međusobne suradnje i koordinacije aktivnosti.

Zaključci ovog dijaloga definitivno su potvrdili i opravdali organizaciju sa ciljem da se institucije moraju koordinirati, posebno kada su u pitanju dozvole za obavljanje biznisa i zaštita investitora. ■



Na korporativnom susretu članova Predstavništva njemačke privrede (AHK) i Vijeća stranih investitora u BiH (FIC) podcrtana neophodnost provođenja ekonomskih reformi

Na ljetnom korporativnom susretu na koji su u petak, 12. juna u sarajevskom restoranu "4 sobe gospođe Safije" u zajedničkoj organizaciji pozvali Vijeće stranih investitora BiH i Predstavništvo njemačke privrede u BiH, negodovano je nepotpisivanje reformske agende, na što su se politički akteri u BiH u okviru njemačko-britanske inicijative prethodno obavezali.



U prisustvu mnogobrojnih visokorangiranih gostiju iz privrednog, diplomatskog, političkog i javnog života BiH, ambasador SR Njemačke u BiH, Christian Hellbach, naglasio je: "Politički akteri ove zemlje trebali bi biti svjesni toga, da je EU ovom inicijativom napravila korak prema ovoj zemlji i da ne postoji alternativa za odlučne privredne i socijalne reforme."

Prema njegovom mišljenju, neusvajanje reformske agende ne bi prošlo bez posljedica na dalji razvoj i približavanje EU integracijama ove zemlje, ali bi prije svega prijetilo pogoršanje privredne i socijalne situacije te kriza javnih budžeta. Značaj provođenja reformi i donošenja reformske agende podcrtao je također i premijer FBiH Fadil Novalić u svom obraćanju prisutnima.

Član Upravnog odbora Vijeća stranih investitora BiH i šef ureda EBRD-a, Ian Brown, istakao je da je ovaj skup još jedan u nizu napora da se BiH pozicionira kao zemlja u kojoj su strane investicije dobrodošle i da su sve aktivnosti Vijeća stranih investitora usmjerene u cilju poboljšanja poslovne klime u BiH.

"Mi kao predstavnici stranih kompanija prisutnih u BiH, koje su dale svoje povjerenje ovoj zemlji, želimo vidjeti napredak u tom smjeru. Za put ka EU izuzetno je važno da procesi donošenja odluka i usvajanje



odgovarajuće legislative bude još učinkovitije i transparentnije - što vodi do političke stabilnosti i ekonomskog rasta. Sa partnerima kao što su AHK BiH i drugim relevantnim i transparentnim udrugama, vjerujemo da možemo biti dobri saveznici u reformama vlastima u BiH", rekao je Brown u svom obraćanju.



Direktor Predstavništva njemačke privrede u BiH, Gunther Neubert, predstavio je ovom prilikom najznačajnije rezultate privrednog istraživanja koje AHK BiH godišnje provodi među svojim članovima.

"Iako opštu privrednu situaciju u zemlji skoro svi ispitanici opisuju kao lošu, većina njih je zadovoljna sopstvenom poslovnom situacijom, pa tako



većina ispitanika planira i dalje investirati i otvarati nova radna mjesta", rekao je Neubert i dodao da je istraživanje pokazalo kako je izvoz od velikog značaja za kompanije, pri čemu 88% svih ispitanika izlazak na njemačko tržište smatra bitnim ili izuzetno bitnim.

Neubert se također osvrnuo na Balkan-sourcing konferenciju u Minhenu, na kojoj se nedavno sastalo 23 industrijska kupca iz Njemačke i 96 dobavljača sa Balkana.

On je rekao da je balkansko dobavljačko tržište zbog cjenovnih prednosti i tehničkog nivoa dobavljača u posljednjih nekoliko godina za njemačke kupce dobilo na značaju te da očekuje da će iz ovih B2B razgovora uskoro proistći i konkretne saradnje. ■

Coca-Cola HBC B-H d.o.o. Sarajevo

Coca-Cola HBC B-H d.o.o. Sarajevo jedna je od najvećih kompanija u industriji bezalkoholnih napitaka u Bosni i Hercegovini i ovlaštena je punionica proizvoda The Coca-Cola Company. Proizvodi i distribuira jedinstven asortiman kvalitetnih robnih marki i opslužuje populaciju od skoro četiri miliona stanovnika, unoseći entuzijazam u plasiranje proizvoda na tržište i iskazujući pritom vodstvo u području korporativne društvene odgovornosti.

Coca-Cola HBC B-H d.o.o. Sarajevo članica je Coca-Cola Hellenic grupe, po veličini drugog sistema punionica proizvoda The Coca-Cola Company u svijetu i najvećeg u Evropi. Coca-Cola Hellenic grupa posluje u 28 zemalja i opslužuje više od 585 miliona ljudi. Sjedište holding kompanije grupe, Coca-Cola HBC AG, nalazi se u Švicarskoj (Zug).

Coca-Cola HBC B-H d.o.o Sarajevo posluje od 1996. godine. Sjedište kompanije i punionica, izgrađena 2000. godine, smješteni su u Sarajevu. Raspolaze s četiri distributivna centra – u Mostaru, Bihaću, Banjoj Luci i Sarajevu. Zapošljava 300 ljudi, a procjena je da svojim poslovanjem indirektno utječe na kreiranje radnih mjesta i zapošljavanje do osam puta više ljudi od broja zaposlenih.

Asortiman proizvoda

Coca-Cola HBC B-H d.o.o. Sarajevo proizvodi, prodaje i distribuira širok asortiman napitaka, od kojih je većina zaštitni znak The Coca-Cola Company. Prodajni asortiman obuhvata:



- vodeće robne marke: Coca-Cola, Coca-Cola Zero, Fanta, Sprite, Cappy, Cappy Tempo i Burn
- domaću robnu marku Olimpija
- robne marke pod licencom drugih kompanija, kao što su Nestea i Schweppes.

Kako bi bila poželjan poslovni partner za više od 14.000 prodavnica, ugostiteljskih objekata, supermarketa, diskontnih lanaca i drugih objekata u kojima prodaje svoje proizvode, kompanija saraduje s kupcima i pomaže im u razvoju njihovog poslovanja.

Kvalitet

Coca-Cola HBC B-H d.o.o. Sarajevo neprestano proširuje asortiman i čini sve kako bi osigurala najbolji kvalitet svojih proizvoda i potrošačima pružila mogućnost što boljeg izbora. Posvećenost tom cilju učvršćuju međunarodni standardi kvaliteta te standardi The Coca-Cola Company. Svi proizvodi kompanije moraju biti u skladu sa zakonskom regulativom Bosne i Hercegovine i moraju ispunjavati ili premašiti standarde kvaliteta i sigurnosti prehrambenih proizvoda, kao i evropske i međunarodne standarde. Poslovanje kompanije odvija se prema međunarodno priznatim stan-

dardima upravljanja sistemima koji se odnose na kvalitet (ISO 9001:2008), zdravstvenu ispravnost prehrambenih proizvoda (ISO 22000), okoliš (ISO 14001:2004) te zdravlje i sigurnost na radu (OHSAS 18001).

Održivost

Coca-Cola HBC B-H d.o.o Sarajevo je posvećena promociji održivog razvoja s ciljem osiguranja budućnosti vlastitog poslovanja i davanja doprinosa za dobrobit društva u cjelini. S obzirom na to da se suočava sa sve više izazova na području održivosti, fokus je na pitanjima koja predstavljaju prioritet za poslovanje, u koja spadaju: očuvanje vodnih resursa, očuvanje energetske resursa i klime, upravljanje ambalažnim otpadom i recikliranje, zdravlje potrošača, razvoj zaposlenih, saradnja s dobavljačima i ulaganje u zajednicu.

Ulaganje u zajednicu

S ciljem razvoja dugotrajnih partnerstava i programa od kojih će zajednica imati istinske koristi, Coca-Cola HBC B-H d.o.o. Sarajevo u saradnji s vodećim ljudima zajednice, vladinim i nevladinim organizacijama svake godine daje svoj doprinos društvu kroz

 VSI PREDSTAVLJA

projekte ulaganja u zajednicu. Pri tome je fokusirana na tri strateška područja:

- zaštitu vodnih resursa i okoliša
- sport i fizičku aktivnost
- razvoj mladih.

Među brojnim, najprepoznatljiviji partnerski projekti u zajednici su: "Čist Vrbas", "Giro di Sarajevo", "Sarajevo polumaraton", "Fitnes dan" kao i dugogodišnja partnerstva na programima deminiranja, te edukaciji djece školskog uzra-

sta o opasnosti od mina i pružanju pomoći u slučaju prirodnih katastrofa i nepogoda u saradnji s Društvom Crvenog krsta/križa Bosne i Hercegovine.

Nagrade i priznanja

Coca-Cola HBC B-H d.o.o. Sarajevo nastoji poslovati odgovorno, dosljedno, proizvoditi napitke visokog kvaliteta i pritom smanjivati utjecaj na okoliš te donositi korist zaposlenima, kupcima, potrošačima i zajednici. Za svoj

rad i doprinos na ovom polju kompanija je primila brojna priznanja koja su samo neki od dokaza kvaliteta, posvećenosti i ugleda koji uživa u zajednici u kojoj posluje. Kao kruna, u septembru 2010. godine u konkurenciji 154 društveno odgovorne kompanije, Coca-Coli HBC B-H d.o.o. Sarajevo dodijeljena je glavna nagrada državnog natjecanja DOBRO'10 i proglašena je društveno najodgovornijim preduzećem godine u Bosni i Hercegovini. ■

Petrol BH Oil Company d. o. o. Sarajevo



Grupacija Petrol je najveća i vodeća slovenska energetska kompanija, glavni strateški dobavljač naftnih derivata i drugih energenata u Sloveniji, najveća grupacija u smislu prometa, jedna od najvećih slovenskih kompanija u smislu profita i, u isto vrijeme, jedan od najuspješnijih poslovnih subjekata u Sloveniji. Svojim jasno definiranim strateškim usmjerenjem i razvojnim prioritetima aktivno sudjeluje u oblikovanju slovenskog energetskog okruženja, a trenutno također postaje važan igrač na energetskim tržištima šire regije jugoistočne Evrope. Petrol se posebno odlikuje kvalitetom svojih proizvoda i usluga, svojim dobrim ugledom, veoma priznatim brendovima i čvrstom finansijskom položaju. Kompanija djeluje u četiri ključna područja poslovanja: prodaja naftnih derivata i druge robe; prodaja i distribucija plina; proizvodnja, prodaja i distribucija električne i druge energije; okoliš i energetska rješenja. Njihovo poslovanje se temelji na promicanju po-

slovne izvrsnosti i na praćenju i poštivanju zahtjeva modernog tržišta u području usluga i zaštite okoliša.

Veoma motivirani i poslovno orijentirani zaposlenici Petrola imaju veliki osjećaj odgovornosti prema svojim kupcima, dobavljačima, poslovnim partnerima, vlasnicima i društvu u cjelini. Kompanija Petrol BH Oil Company d.o.o. Sarajevo osnovana je početkom 1999. godine. U 100% je vlasništvu Petrol dd, Ljubljana. Primarna djelatnost trgovina na veliko i na malo je prodaja tekućih i plinovitih goriva, te srodnih proizvoda. Kompanija Petrol BH Oil Company d.o.o. Sarajevo ima mrežu od 39 benzinskih pumpi, zapošljava oko 250 ljudi, a i jedan su od vodećih uvoznika u BiH. U 2012. godini Petrol grupacija je predstavila visokokvalitetna Q MAX goriva čija kvaliteta zadovoljava visoke europske standarde. Petrol BH Oil Company na svim svojim benzinskim pumpama svojim klijentima u Bosni i Hercegovini nudi visokokvalitetna Q

MAX goriva.

Petrol grupacija:

- 24 kompanije.
- 8 zemalja.
- Mreža maloprodajnih objekata koju od 31. 12. 2014. godine čini 480 benzinskih pumpi.
- Neovisnost i fleksibilnost u generiranju naftnih derivata.
- Vlastita skladišta i optimalna logistička mreža za aktivnosti prodaje ulja.
- Široka maloprodajna mreža benzinskih pumpi u Sloveniji i cijeloj jugoistočnoj Europi.
- Koncept model praktičnosti na benzinskim pumpama.
- Sveobuhvatna opskrba energijom (naftni derivati, plin, toplina, struja, energije i zaštita okoliša).
- Centri za opskrbu energijom (pružaju širok spektar energetskih rješenja).
- Naša ponuda je pouzdana, s dugom tradicijom.
- Stabilna politika dividendi.
- Financijska stabilnost. ■

Philip Morris BH d.o.o.



PHILIP MORRIS
BH D.O.O. SARAJEVO

Philip Morris International Inc (PMI) je vodeća međunarodna duhanska kompanija, sa šest svjetskih top 15 brandova, uključujući Marlboro, svjetski najprodavaniji brend cigareta. Naši međunarodni i lokalni brendovi se prodaju na više od 180 tržišta. PMI posjeduje industrijski najveći i najraznovrsniji portfolio brandova, na čelu s Marlboro, svjetskim broj jedan brendom i L & M, trećim najpopularnijim svjetskim brendom.

U 2014. godini, PMI je držao 15,6% procijenjenog udjela u ukupnom svjetskom tržištu cigareta izvan Sjedinjenih Američkih Država, odnosno 28,6% isključujući Narodnu Republiku Kinu i Sjedinjene Američke Države. PMI ostali vodeći svjetski brendovi su Bond Street, Parlament, Philip Morris, Chesterfield i Lark. Naši ciljevi su pružanje visoko kvalitetnih i inovativnih proizvoda odraslim pušačima, generiranje vrhunskog

povrata ulaganja dioničarima, te reduciranje štete uzrokovane pušenjem, a sve to tijekom održivog i integrativnog poslovanja. Naši zaposlenici su jedan od naših najvećih prednosti i ključ uspjeha naše kompanije. Naša raznolika globalna radna snaga koja broji više od 82.000 zaposlenih, u proizvodnim i prodajnim objektima širom svijeta, govori više od 80 jezika, a dolazi iz svih krajeva svijeta.

U februaru 2015. PMI je certificiran kao Najbolji Poslodavac Evrope već treću godinu za redom i priznat kao vodeći poslodavac u 15 evropskih zemalja.

Gdje god proizvodimo, primjenjujemo iste zahtjevne standarde kako bi osigurali vrhunsku kvalitetu koju konzumenti naših brandova i očekuju. Cilj nam je smanjiti štete uzrokovane pušenjem podržavajući učinkovite ute-

meljene regulacije duhanskih proizvoda, te ulaganje u razvoj proizvoda s potencijalom za smanjenje rizika od bolesti povezanih sa konzumiranjem duhana.

Zalažemo se za poslovanje sa integritetom i fokusirani smo na dugoročno održivi rast. PMI primjenjuje visoke standarde svugdje gdje posluje i postavlja jasne i mjerljive ciljeve koji nam pomažu smanjiti štetan utjecaj na okoliš. Također podržavamo zajednice u kojima naši zaposlenici žive i rade, kao i zajednice gdje se nalaze izvori naših duhanskih sirovina.

Philip Morris ima dugu i uspješnu tradiciju u Bosni i Hercegovini, te unatoč izazovima naše poslovanje raste dok pružamo konzumentima cigarete i duhan najveće kvalitete sa stalnim inovacijama naših proizvoda. ■

KRUPA KABINE d.o.o.

Proizvodnja kabina za radne strojeve

Osnovna djelatnost naše kompanije u grani metaloprerade je proizvodnja kabina za radne strojeve koji se koriste u građevinarstvu i poljoprivredi Poduzeće KRUPA KABINE d.o.o. osnovano je 1980. godine, a djeluje i radi na području općine Bosanska Krupa, tačnije u Unsko-sanskom kantonu. U svom dosadašnjem radu poduzeće je nekoliko puta mijenjalo svoj proizvodni



KRUPA KABINE D.O.O.
SIAC GROUP
PROIZVODNJA KABINA

program, pretežno u skupini metaloprerade kao i sam oblik organiziranja rada i prerade. Privatizacija je izvršena 2001. godine, a u grupaciju SIAC iz Italije KRUPA KABINE d.o.o. ušla je 2006. gdje se i danas nalazi.

Proizvodni program

Osnovna djelatnost naše kompanije u grani metaloprerade

je proizvodnja kabina za radne strojeve koji se koriste u građevinarstvu i poljoprivredi.

Od trenutka privatizacije (2001. godine) došlo je do permanentnog ulaganja u proizvodne objekte, opremu, uvođenje novih tehnologija te kontinuirano educiranje postojećih kao i novih zaposlenika.

Usvojeni su novi proizvodni programi i počela je proizvodnja:

- opreme za poljoprivredu (širok spektar poljoprivrednih strojeva, priključaka i alata),
- autobusni program (metalne konstrukcije autobusa, šasije, stranice i krovovi autobusa),
- kabine za radne strojeve u građevinarstvu i poljoprivredi.

2006. godine kada je ovu kompaniju kupila grupacija SIAC iz Bergamo – Italija, osnovna djelatnost kompanije je proizvodnja kabina.

U sljedećem razdoblju došlo je do dodatnih ulaganja u opremu i infrastrukturu kao i dodatno educiranje zaposlenika od stručnog kadra iz Italije.

Izvršeno je proširenje proizvodnog programa i novih tipova kabina te su u tom razdoblju radili 22 kabine na dan, tehnološke gotovosti do razine lakiranja, i kontejnere za kamione koji nose otpad.

Ulaganja u proizvodne hale

U razdoblju 2012. - 2014. godine izvršena su nova ulaganja u proizvodne hale (nove) te u opremu približno 4,000.000 eura. Nakon izvršenih ulaganja usvojeno je 13 novih proizvoda, povećan je broj zaposlenih i povećan je broj novih jedinica kabina (52 kabine na dan).

Trenutačno u našoj kompaniji radi 220 zaposlenika i ostvaruje vrijednost mjesečne proizvodnje 1,200.000 eura. Mi izvozimo 95 posto našeg proizvoda u 'majčinsku' kompaniju u Bergamu (Italija) i 'sestrinsku' kompaniju koja se nalazi u Sezani (Slovenija).

Naš finalni proizvod se boji i sastavlja sa svim potrebnim elementima da bi se gotova kabina dostavila krajnjem kupcu: sjedište, upravljač, klima, navigator.

Mi radimo s najvećim i najjačim proizvođačima radnih strojeva kao što su CATERPILLAR, CNH, BOBCAT, MANITU, HITACHI, JLG, KOMATSU, LIEBHERR, JCB i mnogi drugi koji prodaju svoje strojeve na europskom i svjetskom tržištu. Grupacija SIAC je uspjela opstati i preživjeti tešku evropsku krizu s velikom reorganizacijom svoje kompanije i svog poslovanja te se trudi ići u smjeru gdje se gleda veća učinkovitost i manji trošak proizvodnje.

Zahvaljujući dugogodišnjem iskustvu i povjerenju koje imamo od kupaca, naša grupacija pokriva oko 95 posto tog sektora.

Možemo reći da smo najteže razdoblje preživjeli i da smo sami sebe iznenadili koliko smo uspjeli poboljšati proizvodnju da bismo ostali na visokoj razini kvalitete, pouzdanosti vremena isporuke kod kupca i po ponuđenoj cijeni koja nam omogućava da ostanemo kompetitivni i dobijemo nove narudžbe. Mi smo zadovoljni i ponosimo se našim ljudskim resursima koji rade u Bosni i cijele grupacije jer bez njih danas ne bismo bili ovdje i pričali o nama. Reorganizacija nije stala i ne smije stati, mi se trudimo ostati na vrhunskoj poziciji naših kompetitora i ove godine imamo u planu povećati za 10 posto učinkovitost te smanjiti troškove za 10 posto.

Izvoz

Trenutačno većinu proizvoda izvoze u kompaniju Bergamo

u Italiji. Kompanija KRUPA KABINE je orijentirana na više potencijale i snagu tržišta na kojem rade, kao npr. na Bosnu i Hercegovinu.

Počeli smo surađivati s lokalnim kompanijama, ali želimo postići mnogo više, cilj nam je pronaći nove kupce, firme kojima su potrebni naši proizvodi vezani za metaloprerađu: obrada limova i cijevi, varenje, projektiranje i druge.

Našim iskustvom i timom ljudi koji rade po visoko kvalitetnim standardima mogli bismo još bolje raditi i podignuti razinu i drugih kompanija koje rade u ovoj državi.

Kostur kabina

Naš proizvod je kostur kabina koji je sigurnosna konstrukcija za osobu koja će voziti traktor ili stroj. Čelik treba biti određenog sastava, treba zadovoljiti sve evropske standarde kvalitete kao i kvalitetu koju zahtjeva kupac. Kosturi kabine su ispitani ROPS i POPS metodom.

Kada vidite bilo koji radni stroj na putu, na njivi, na gradilištu i u bilo kojoj europskoj državi, vjerojatno vidite kabinu koja je proizvedena u Bosanskoj Krupi.

Nadamo se da ćemo kroz ovaj članak na najbolji način predstaviti našu kompaniju i mogućnosti za novi proizvod za domaće kompanije.

Osim pronalaženja novih kupaca, cilj nam je i pokrenuti novi proizvod osim proizvodnje kabine.

U ime toga nadamo se da svojim uspješnim primjerom možemo biti recept i snaga za ideje prilikom započinjanja biznisa. ■

Jelica Grujić, direktorica Agencije za unapređenje stranih investicija u Bosni i Hercegovini (FIPA)

Susjedne zemlje su u posljednjih nekoliko godina poboljšale svoj poslovni ambijent. Zašto BiH zaostaje za njima? Da li postoji bojazan da će strana ulaganja planirana u BiH početi da se prebacuju u druge zemlje regiona?

Poslovno okruženje je sveobuhvatan skup internih i eksternih faktora a njegovo unapređenje je stalan proces. Konkurencija, ekonomski trendovi i privredni razvoj kontinuirano nameću obavezu prilagođavanja, neko to radi brže neko sporije, a oni proaktivniji te promjene i kreiraju. Ako govorimo o zemljama u okruženju može se reći da su završile određene procese koji mi nismo ali to ne mora da znači da će investitori na isti način ocijeniti njihovo iskustvo. Svaki investitor pojedinačno ima svoje razloge i kriterijume po kojima vrednuje investicionu lokaciju i sigurna sam da ozbiljan investitor neće nikada davati generalne ocjene bazirane na neobjektivnim percepcijama niti donositi odluke bez detaljne analize.

Koje su prioritetne reforme koje BiH treba sprovesti u cilju unaprijeđenja poslovnog okruženja?

Sve je promjenljivo samo su reforme stalne a ukoliko te reforme imaju određene zastoje onda se i prioriteti nagomilaju. Radno zakonodavstvo, poreska politika, harmonizacija zakonodavstva sa EU, har-



monizacija regulative među entitetima i kantonima u čijoj nadležnosti su i resursi i privredni kapaciteti, pravosuđe, skraćanje svih administrativnih procedura, smanjenje korupcije, stvaranje administracije koja je u službi privrede, školski sistem prilagođen potrebama privrede... su samo neki od prioriteta.

Prema posljednjim podacima sa kojima FIPA raspolaže kolika su iznosila prošlogodišnja strana ulaganja u BiH? Koja zemlja prednjači po visini direktnih stranih ulaganja u BiH?

Prema preliminarnim podacima Centralne banke a u okviru platnog bilansa investicije su iznose 819 miliona KM što je značajan porast u odnosu na 418 miliona što je evidentirano u 2013. godini. Najznačajnija ulaganja u 2014 su iz Rusije, Velike Britanije, Austrije, Luksemburga, Hrvatske, Švajcarske. I Prethodne godine se najviše ulagalo u sektor proizvodnje, a u ukupnim iznosima ulaganja Austrija, Srbija, Hrvatska, Slovenija i Rusija i dalje su na vrhu ljestvice.

Prema vašem iskustvu, koji su to potencijali BiH

koji najviše privlače strane ulagače, odnosno koji je to ključni motiv za ulaganja u BiH?

Osnovni i jedini motiv investitora je ostvarenje profita. Analizirajući dosadašnja ulaganja najznačajnija su bila resursno ili tržišno orijentisana a i ukupni operativni troškovi su podsticajni.

Neiskorišteni prirodni resursi, nepokriveno tržište, geografski položaj, konkurentna radna snaga su najčešći razlozi kojima se vode investitori u donošenju odluke o investiranju.

Pored privlačenja investitora iz stranih zemalja, da li FIPA pruža pomoć i domaćim poduzetnicima u smislu njihove promocije i povezivanja na i sa stranim tržištima?

Saradnja sa domaćim preduzetnicima se odvija u dijelu prikupljanja i promovisanja projekata za investiranje. Projektne ideje ili prijedloge za saradnju sa stranim investitorima FIPA distribuira svim raspoloživim kanalima promocije. Cilj nam je da se za te konkretne projekte nađu partneri među potencijalnim investitorima.

U većini zemalja regiona osnovane su državne agencije kojima je zadatak da privuku i zadrže strane investitore. Da li imate suradnju sa tim agencijama, kao sto su SIEPA iz Srbije, MIPA iz Crne Gore, AIC iz Hrvatske?

Da, FIPA ima dobru saradnju sa svim ovim agencijama. Aktivan smo član i Svjetske asocijacije agencija za promociju

stranih investicija – WAIPA, uključeni smo u sve regionalne inicijative koje se tiču stranih investicija i partneri smo u velikom broju projekata koji se implementiraju u BiH (IFC- članica Grupacije Svjetske banke, USAID-SIDA, UNCTAD, RRC)

Na koji način FIPA privlači strane investitore da ulažu u BiH? Koji su to najvažniji projekti koje FIPA realizuje u tom cilju?

Kao i sve agencije koje se bave sličnim aktivnostima i FIPA koristi sve raspoložive promotivne kanale da do ciljne grupe distribuira informacije koje mogu direktno ili indirektno da utiču na proces donošenja odluke o investiranju. Promotivni materijali, lični kontakti, mediji, konferencije, prezentacije, pošta, elektronska pošta, napredna IT komunikacija su samo neki od kanala kojima se svakodnevno distribuira detaljne, koncizne i ažurirane informacije.

Molim Vas da nam predstavite Aftercare program FIPA-e?

Pored aktivnosti koje se odnose na promociju stranih investicija, jednako bitan je onaj dio koji se odnosi na postinvesticionu podršku ili tzv. Aftercare program. Svjetske analize ali i podaci o investicijama u BiH pokazuju da veliki udio u investicijama imaju reinvesticije čime ova ciljna grupa postaje još značajnija.

Suština ovog programa jeste održavanje kontakata sa postojećim kompanijama i asistiranje u rješavanju određenih pitanja ukoliko je to

potrebno. Dodatno, poslovna zajednica predstavlja značaja izvor informacija i prijedloga za unapređenje poslovnog okruženja.

Ovakva redovna komunikacija je veoma pozitivno ocijenjena od strane investitora posebno uzimajući u obzir da se posjete organizuju zajedno sa predstavnicima drugih nadležnih institucija, entitetskih, kantonalnih i opštinskih.

Obzirom da je Aftercare program zaista konkretna podrška stranim investitorima prisutnim na tlu BiH, možete li nam predstaviti rezultate zadovoljstva / nezadovoljstva investitora? Šta slijedi u nastavku Aftercare?

U 2014. godini FIPA je posjetila 70 kompanija. Nisu zadovoljni u potpunosti, potrebno je mnogo da se uradi na ukupnom poslovnom ambijentu, ali sama činjenica da više od 70% posjećenih kompanija planira i nova ulaganja i nova zapošljavanja potvrđuje da je investiciona lokacija opravdala njihova očekivanja.

Koje su to konkretne preporuke koje će FIPA predstaviti Savjetu ministara BiH?

Konkretne mjere se odnose na dopune zakona privrednim društvima, nortarima, porezu na dohodak, porezu na dobit, PDV-u, likvidacionom postupku, preporuke koje se odnose na parafisklane namete, skraćivanje rokova, smanjenje taksi su samo dio predloženih mjera.

Predložene mjere se odnose i na mjere iz nadležnosti entiteta i institucija BiH. ■

Konferencija “Politika zaštite konkurencije na putu pristupa EU”

Kancelarija Karanović & Nikolić u saradnji sa Fondacijom Friedrich Naumann za slobodu organizovala je 20. februara 2015. godine u hotelu Europa konferenciju pod nazivom “Politika zaštite konkurencije na putu pristupa EU”. Preko 70 delegata iz privatnog, vladinog i nevladinog sektora imali su priliku da sagledaju najvažnije aspekte prava zaštite konkurencije u Jugoiistočnoj evropskoj regiji i konkretno u Bosni i Hercegovini.

Događaj su otvorili Charles du Vinage iz Fondacije Friedrich Naumann za slobodu i Adrian Pollmann iz Njemačke ambasade u Sarajevu, koji su govorili o vezi između demokratije i konkurentnog ponašanje među kompanijama. Nakon uvodnih izlaganja uslijedila je panel diskusija čiji moderator je bio Nihad Sijerčić, partner kancelarije Karanović & Nikolić.

O implementaciji i provođenju Zakona o zaštiti konkurencije u BiH govorili su Gordana Živ-

ković, član Konkurencijskog vijeća BiH, Branko Morait i Jadranka Brenjo, sudije suda Bosne i Hercegovine. Regionalnu perspektivu o pravu konkurencije su potom predstavili stručnjaci konkurencije Prof. dr. Dijana Marković-Bajalović i Olgica Spevec.

Diskusija je nastavljena izlaganjem ekonomiste Kjetil Tvedt predstavnika EBRD-a koji je govorio o politici konkurencije i tranziciji, te advokata Franck Audran iz GIDE koji je

govorio o jedinstvenom aspektu zakona o konkurenciji i politici u sektoru telekomunikacija. KN partner i šef prakse za konkurenciju Ratko Petaković, partner u kancelariji Karanović & Nikolić govorio o uticaju zakona o konkurenciji na investitore. Izlaganja su podstakla duge diskusije između delegata i učesnika panel diskusije o političkim i ekonomskim posljedicama u okvirima konkurencije i izazovima u provođenju u BiH. ■



Predstavljanje projekta “Žene u biznisu” - EBRD i UniCredit Bank Banja Luka

UniCredit Bank Banja Luka, u suradnji s Evropskom bankom za obnovu i razvoj (EBRD), je pokrenula projekt i kreditnu liniju pod nazivom “Žene u biznisu”, koja je namijenjena svim pravnim tvorevinama u kojima je žena u potpunom ili djelomičnom vlasništvu ili obavlja neku od kontrolnih funkcija.

Program “Žene u biznisu” podrazumijeva finansijsku i savjetodavnu podršku. Potpisivanje ugovora između UniCredit Bank Banja Luka i

EBRD se održalo u srijedu, 11. februara 2015. godine u Muzeju suvremene umjetnosti u Banjoj Luci.

Događaju su prisustvovali predstavnici ambasada Švedske, Norveške i Luksemburga, Švedske međunarodne agencije za razvoj (SIDA), ministarstva Republike Srpske (RS), Gender centar iz RS-a, Agencija za bankarstvo RS-a, članovi Trgovinske komore RS-a i mnoge uspješne poduzetnice iz BiH. ■



EBRD u Sarajevu predstavila izvještaj o tranziciji za 2014. godinu

Evropska banka za obnovu i razvoj (EBRD) je predstavila svoj izvještaj o tranziciji za 2014. godinu u Sarajevu, glavnom gradu Bosne i Hercegovine, u srijedu 25.02.2015. godine.

Predstavljanje EBRD-ovog ažuriranog godišnjeg izvještaja o napretku reformi i ekonomskim kretanjima diljem 35 zemalja od centralne Evrope do centralne Azije, zapadnog Balkana, južnog i istočnog Mediterana održalo se u Centralnoj banci Bosne i Hercegovine.

EBRD-ov izvještaj o tranziciji 2014 prikazuje neke od ključnih zbivanja u Bosni i Hercegovini u proteklih godinu dana, te razmatra predstojeće tranzicijske izazove - u zemlji i široj regiji. Izvještaj pod nazivom "Inovacija u tranzici-

ji" je fokusiran na to kako pojedine kompanije širom tranzicijske regije osmišljavaju i otkrivaju kako inovacija može povećati produktivnost kompanije, potaknuti ekonomski rast i tranziciju ponovo učiniti energičnijom. Izvještaj, također, daje uvid u to kako menadžerske prakse utječu na produktivnost kompanije. Vlade imaju važnu ulogu u oblikovanju poslovnog okruženja u kojem kompanije posluju, ali one, također, mogu izravnije promovirati inovacije prilagođavajući određene politike lokalnim okolnostima i uzimajući u obzir, kako su pojedine industrije rangirane u odnosu sa svjetskim liderima u tehnologiji.

Prezentacija je ukazala na neke od glavnih nalaza Izvješća o tranziciji za 2014. godinu i opisala ulaganja EBRD-a,



te druge aktivnosti u Bosni i Hercegovini.

Govornici su bili Kemal Kozarić, guverner Centralne banke Bosne i Hercegovine, Peter Sanfey, EBRD zamjenik direktora za strategiju zemlje i Ian Brown, voditelj Ureda EBRD-a u Sarajevu. ■

Wolf Theiss proglašen za 'Pravnu kompaniju godine: istočna Evropa i Balkan'

Na evropskoj ceremoniji dodijele nagrada za pravnike, održanoj u Londonu, 12.03.2015. godine, Wolf Theiss je treći put imenovan za 'pravnu kompaniju godine: istočna Evropa i Balkan' prateći prethodne uspjehe u ovoj kategoriji ostvarene 2009. i 2012. godine, dok su, u isto vrijeme, nominirani u ukupno pet kategorija. Suci su pohvalili jak tržišni fokus Wolf Theiss-a dok postaje pravi regionalni igrač.

Ostali faktori koji su pridonijeli ovoj odluci su dosljednost u osiguravanju mandata u široj regiji i prošlogodišnja uključenost Wolf Theiss-a u neke od najvećih i najkom-

pleksnijih poslova na Balkanu. Ispred Wolf Theiss-a nagradu su preuzeli Luka Tadić - Čolić i Laura T. Struc. Wolf Theiss, sa sjedištem u Austriji, pokazao je svoj uspjeh van granica Beča svojom dosljednošću u osiguravanju mandata u široj regiji i činjenicom da se nastavlja razvijati diljem istočne Evrope i Balkana.

Prošle godine, četiri od pet promaknuća u partnera su se desile u ovoj regiji - od toga su bile tri žene.

Suci su pohvalili snažan rast kompanije, njeno ulaganje u regionalnu interakciju i jak tržišni fokus. ■



Održani BOSCH Dani otvorenih vrata

U Herceg ETNO selu u Međugorju 21. maja održan je tradicionalni, godišnji susret partnera i klijenata kompanije Bosch Security Systems za bosanskohercegovačko tržište. Dani otvorenih vrata privukli su 70-ak prisutnih, koji su u odličnoj atmosferi i ugodnom ambijentu imali priliku da se upoznaju sa posljednjim inovacijama ove renomirane njemačke kompanije.

Kompanija Bosch sigurnosni sistemi jedna je od onih koje pružanjem maksimalne podrške svojim partnerima i visokim stepenom profesionalnosti nastoje ostvariti što bolji uspjeh na tržištu i time potvrditi kvalitet koji stoji iza ovoga brenda. Takva podrška ogleda se, između ostalog, u čestim edukacijama i savjetovanjima, koje se na kraju krunišu godišnjom konferencijom svih partnera i klijenata ove kompanije. Nastavljajući tu tradiciju, ovogodišnji skup održan je u Herceg ETNO selu u Međugorju, magičnom hercegovačkom ambijentu, čime je napravljena jedna vrsta odmaka od dosadašnjeg urbanog okruženja, u kojem su se održavali susreti ovakvog tipa. Kao i godinama ranije, suorganizaciju i medijsko pokroviteljstvo potpisao je magazin a&s Adria, uz čiju je podršku ovaj event ostvario jednako dobre rezultate kao na ranijim susretima u Sarajevu i Mostaru.

Specijalni gosti

Konferenciju je otvorio regionalni voditelj Bosch sigurnosnih sistema Danijel Jerković, koji već godinama uspješno vodi poslovanje ove kompanije



je u Sloveniji, Hrvatskoj i BiH. Vršeći presjek dosadašnjih susreta od 2011. godine, Jerković je uputio zahvalu svim prisutnim naglasivši kako je Boscheva namjera da na ovaj način pruži "adekvatnu podršku lokalnim partnerima u ovom dijelu zemlje".

Nakon toga riječ je data specijalnim gostima: načelniku Općine Čitluk Ivi Jerkiću, koji je prisutnima izrazio dobrodošlicu i zaželio uspješno poslovanje, te Bojani Škrobić-Omerović, izvršnoj direktorici Vijeća stranih investicija (VSI), koja je predstavila rad VSI-ja na promovisanju Bosne i Hercegovine kao zemlje atraktivne za ulaganja, uprkos svim preprekama koje investitorima stoje na tom putu.

Naime, upravo je Bosch jedna od 45 članica Vijeća koje sa 4,5 milijarde eura aktivno doprinose ulaganju u ovu zemlju, vrše transfer znanja, modernizuju tržište i predstavljaju nova znanja i tehnologije.

Druga kompanija na svijetu

Nakon toga riječ je opet uzeo gosp. Jerković, predstavljajući sve ono što čini kompaniju Robert Bosch. A stvari stoje ovako. Bosch grupacija ima 290.000 saradnika širom svijeta, prodajne prihode 48,9 milijardi eura, vrši ulaganja u nove tehnologije u iznosu 4,7 milijardi i inovira gotovo 13 patenata dnevno.

Što se tiče Bosch sigurnosnih sistema, riječ je o drugoj kompaniji u globalnoj industriji sigurnosti sa prodajom većom od dvije milijarde eura godišnje i 12.400 uposlenih saradnika. Sam portfolio proizvoda jedan je od najširih na svijetu, a pokriva gotovo sve oblasti tehničke sigurnosti: videonadzor, detekciju upada, vatrodaju, sisteme glasovne evakuacije, konferencijske sisteme te kontrolu pristupa i upravljačke sisteme. "Samim tim je razumijevanje ponude mnogo dublje i šire, što nije slučaj kada kom-

panija proizvodi samo jednu vrstu proizvoda", naglasio je Jerković ovu ključnu Boschevu razlikovnost.

Adresiranje svih vertikalnih tržišta

Upravo takva raznovrsnost Bosch sigurnosnim sistemima omogućava da nude rješenja za sva vertikalna tržišta. Od stambenog i zdravstvenog, preko obrazovnog, finansijskog, maloprodajnog, transportnog i komercijalnog do vladinog sektora – Bosch je kompanija koja uspijeva odgovoriti različitim potrebama tih vertikala. Kada je riječ o BiH, predviđanja za period do 2018. govore da će se najviše ulagati u transportni sektor (primarno autoput 5C), javnu sigurnost (zatvori, kontrola granica i sudovi) i kritičnu infrastrukturu (termoelektrane, hidroelektrane i cementara Banovići), gdje će kompanija Bosch upravo nastojati ponuditi najbolje i najkvalitetnije rješenje. A samih referenci svakako ne manjka. Bosch je u regionu uspješno realizirao niz reprezentativnih projekata: od Sarajevo City Centra, sjedišta Al Jazeera, Fabrike duhana Sarajevo i Zenica Arene u BiH, preko JANAF plinovoda, zgrade HRT-a, Arene Zagreb, Marine Frapa, do Aerodroma Maribor, Slovenskih željeznica, nuklearne elektrane Krško i Arhiva u Sloveniji. Lista koja zasigurno potvrđuje kvalitet njemačkog brenda.

Stanje zaštite od požara u BiH

Hadis Hadžić, stručni saradnik za poslove zaštite od požara u BiH iz firme Vatrosistemi, predstavio je a zatim i kritički

evaluirao zakonsku regulativu koja uređuje ovu oblast. Iako ne postoji jedinstven zakonski okvir za cijelu BiH, nije ujednačen broj donesenih pravilnika među entitetima i pojedini kantoni nisu uskladili kantonalne propise sa federalnim, Hadžić je istaknuo da se "opće stanje regulative na prostoru BiH može okarakterisati zadovoljavajućim".

Problem koji je postojao od 1996. godine, kada nisu postojali adekvatni propisi, riješen je usvajanjem novih zakonskih rješenja, ali njihovo provođenje i dalje je ostalo problem. Mnogi ranije instalirani aktivni sistemi zaštite od požara su sumnjive kvalitete, bez servisa i adekvatnih rezervnih dijelova, a kao posljedica toga naveden je primjer u požaru preminule djece u Dječijem domu Bjelave u Sarajevu, koji su 2007. stradali zbog nefunkcionalnog vatrodajnog sistema. Kako je istaknuto, rješenje je u edukaciji, provođenju svih mjera, podizanju svijesti o važnosti zaštite od požara te kvalitetu proizvoda koji nude respektabilne kompanije.

Trendovi u Bosch-evom IP videonadzoru

Nakon pauze prisutni su imali priliku da slušaju Szűcsa Gábora iz Boschevog Odjela za razvoj poslovanja u jugoistočnoj Adriatic regiji. Gost iz Mađarske u iscrpnom je predavanju predstavio IP tehnologije i proizvode koje na tržištu nudi kompanija Bosch.

Kao glavnu značajku istaknuo je kvalitet, koji su investitori i izvođači odabrali u više od 500 uspješno završenih velikih projekata u ključnim ver-

tikalama u proteklih pet godina. "Jedini način da se pokaže kvalitet Boscha je testiranje i demonstracija opreme", rekao je Gábor, dodavši da će prisutni imati priliku da sami testiraju opremu i da se uvjere u njen kvalitet.

Predavanje su pratile i demonstracije instaliranih kamera širom Evrope, kojima je pristupao i upravljao iz Međugorja i prezentirao ugrađene tehnologije poboljšavanja kvaliteta slike. Istaknuto je da Bosch nije najbolji na tržištu u pogledu veličine rezolucije, ali da uvijek vodi računa o svjetlosnoj osjetljivosti, koju "stavlja u prvi prioritet".

Zbog toga njihove kamere nikada ne zaostaju kvalitetom za drugima na tržištu. Ono što je također bilo značajno za čuti jesu i glavni pravci razvoja ove kompanije u pogledu IP tehnologija, a to su visok kvalitet relevantnih snimaka, inteligentna analiza, efikasna propusnost i upravljanje pohranom. U ovim segmentima možemo očekivati napretke u godinama koje su pred nama. Na kraju, riječ je preuzeo Dino Juriša iz Odjela toplinske tehnike kompanije Bosch, informišući prisutno najnovijim dostignućima u ovome segmentu.

Osim predstavljanja noviteta i njihovih najinteresantnijih karakteristika i benefita koji prate implementaciju takvih rješenja, apostrofirana je energetska efikasnost i efikasnija transformacija energije koju nude Bosch-eva toplinska rješenja. Time je naglašena ne samo kvaliteta takvih rješenja već i dugoročne uštede svake godine sve skupljih energenata. ■

Adria Security Samit 2015

Adria Security Samit jedinstven je godišnji konferencijsko-izložbeni događaj industrije sigurnosti Jadranske regije. Skup će se održati od 8. do 10. septembra u Sarajevu, a okupit će sve učesnike u prodajnom lancu: proizvođače, distributere i zastupnike, instalaterske kompanije, sistem-integratore, konsultante i krajnje korisnike u svim vertikalnim tržištima. Događaj se održava uz suorganizaciju i partnerstvo vodećih strukovnih udruženja iz BiH, Hrvatske, Makedonije, Slovenije i Srbije, a epitet istinski regionalnog potvrdit će i promjenom mjesta održavanja, jer će se svake godine održavati u drugoj zemlji regije. Samit će se sastojati od dva segmenta: konferencijskog i izložbenog. Na konferencijskom dijelu prisutni će imati priliku slušati neke od najuspješnijih stručnjaka iz oblasti sigurnosti, koji će govoriti o trendovima u toj industriji, migraciji ka IP tehnologijama, naprednim integracijskim



konceptima, umreženoj sigurnosti, razvoju kompanija, tehnologijama u kontroli pristupa, privatnoj sigurnosti, internetu stvari i tržištima zemalja Jadranske regije. U izložbenom dijelu svoje usluge i proizvode će predstaviti vodeći proizvođači i distributeri iz regije i svijeta, koji će prisutnima prezentirati bogat portfolio usluga i tehnoloških noviteta. Drugi dan konferencije učesnike očekuju i avanture na otvorenom:

uzbudljivi rafting rijekom Neretvom, uživanje u tradicionalnim specijalitetima i posjeta jednom od najimpozantnijih građevinskih objekata bivše Jugoslavije – tajnom komandnom centru JNA u Konjicu. Sve informacije o Adria Security Samitu možete pronaći na asadria.com/summit. Broj sudionika je ograničen, stoga se registrirajte na vrijeme i osigurajte svoje mjesto na vodećem događaju u Jadranskoj regiji. ■

WOLF THEISS već 10 godina podržava strana ulaganja u BiH

Značajan partner investitorima i institucijama u savladavanju prepreka i poboljšavanju poslovne klime, austrijska konsultantska kuća, WOLF THEISS, u četvrtak, 11. juna, 2015. godine, prijemom za goste i poslovne saradnike, vodeće lokalne i međunarodne kompanije, te predstavnike diplomatskog kora, međunarodne zajednice i javnog života, u restoranu Začin u Sarajevu, svečano je obilježila 10 godina poslovanja u Bosni i Hercegovini. Zvanicama su se obratili Naida Čustović, advokatica iz Sarajeva koja saraduje sa Wolf Theiss-om i Ronald Given, partner Wolf Theiss-a, sa zavid-



nom međunarodnom karijerom i preko 30 godina iskustva u SAD-u, Europi, Kini, Indoneziji, Vijetnamu, Singapuru, koji je naglasio svoje zadovoljstvo poslovnim uspjesima i realizovanim projektima iz oblasti energetike, infrastrukture, spajanja i akvizicija u proteklih 10 godina i izrazio svoja očekivanja i nade da će ekonomski

rast i razvoj biti prioritet svih subjekata u Bosni i Hercegovini. WOLF THEISS je vodeća međunarodna pravna konsultantska kuća u CEE/SEE koja je aktivna u Bosna i Hercegovini od 2005. godine i pruža stalnu podršku stranim investitorima. Pored aktivnosti u pravcu pružanja savjetodavnih usluga vodećim stranim kompanijama u proteklih 10 godina Wolf Theiss je dao i značajan doprinos poboljšanju uslova poslovanja privrednih subjekata kroz izmjene raznih zakona u saradnji sa Vijećem Stranih Investitora BiH, nadležnim ministarstvima i međunarodnim organizacijama. ■

SLUŽBENI GLASNIK BOSNE I HERCEGOVINE

Parlamentarna skupština BiH

- Zakon o izmjenama i dopunama Zakona o politici direktnih stranih ulaganja u BiH Sl. Glasnik BiH 22/15-1
- Zakon o izmjenama i dopunama Krivičnog zakona BiH Sl. Glasnik BiH 22/15-3

Ministarstvo finansija i trezora BiH

- Naredba o dopuni Naredbe o uplatnim računima za administrativne takse Sl. Glasnik BiH 6/15-1
- Naredba o izmjenama i dopunama Naredbe o uplatnim računima za administrativne takse Sl. Glasnik BiH 12/15-1

Agencija za javne nabavke BiH

- Pravilnik sa popisom ugovornih organa po kategorijama koji su obavezni primjenjivati Zakon o javnim nabavkama Sl. Glasnik BiH 21/15-16
- Uputstvo o izmjeni Uputstva za pripremu modela tender-ske dokumentacije i ponuda Sl. Glasnik BiH 20/15-24

Uprava za indirektno oporezivanje BiH

- Uputstvo o izmjeni Uputstva o provođenju postupka po karnetu TIR Sl. Glasnik BiH 24/15-2
- Uputstvo o preduzimanju mjera osiguranja u postupku registracije i upisa u Jedinstveni registar obveznika indirektnih poreza Sl. Glasnik BiH 25/15-116
- Uputstvo o pojednostavljenom carinskom postupku za robu koja se prenosi cjevovodom i električnim vodom Sl. Glasnik BiH 34/15-1

Visoko sudsko i tužilačko vijeće BiH

- Kodeks o dopuni Kodeksa sudske etike Sl. Glasnik BiH 24/15-89
- Poslovnik o ID Poslovnika

Visokog sudskog i tužilačkog vijeća BiH Sl. Glasnik BiH 27/15-124

SLUŽBENI GLASNIK REPUBLIKE SRPSKE

Narodna skupština RS

- Zakon o mjerama sigurnosti u poslovanju gotovim novcem i drugim vrijednostima Sl. Glasnik RS 33/15-1

Ministarstvo finansija RS

- Pravilnik o izmjeni Pravilnika o promjeni Zakona o porezu na dohodak Sl. Glasnik RS 9/15-9
- Pravilnik o uvjetima, načinu i postupku utvrđivanja porezne osnovice procjenom Sl. Glasnik RS 10/15-15

Ministarstvo pravde RS

- Pravilnik o disciplinskoj odgovornosti notara Sl. Glasnik RS 14/15-2
- Regulatorna komisija za energetiku Republike Srbije
- Pravilnik o izmjenama i dopunama Pravilnika o tarifnoj metodologiji i tarifnom postupku za električnu energiju Sl. glasnik RS 15/15-39
- Odluka o usvajanju Pravilnika o izmjenama i dopunama Pravilnika o tarifnoj metodologiji i tarifnom postupku za električnu energiju Sl. glasnik RS 16/15-28

Ministarstvo za prostorno uređenje, građevinarstvo i ekologiju RS

- Pravilnik o obrascu zahtjeva za izdavanje dozvole za skladištenje, tretman i odlaganje otpada Sl. Glasnik RS 18/15-3
- Pravilnik o dopunama Pravilnika o uvjetima za izdavanje i oduzimanje licenci učesnika u građenju Sl. Glasnik RS 24/15-22
- Pravilnik o minimalnim zahtjevima za energetske karakteristike zgrade Sl. Glasnik RS 30/15-2

- Pravilnik o metodologiji za izračunavanje energetske karakteristike zgrade Sl. Glasnik RS 30/15-24

- Pravilnik o vršenju energetske pregleda zgrada i izdavanju energetske certifikata Sl. Glasnik RS 30/15-36

Agencija za bankarstvo RS

- Odluka o izmjeni Odluke o privremenim mjerama za reprogram kreditnih obaveza fizičkih i pravnih lica u bankama Sl. Glasnik RS 1/15-13
- Odluka o izmjeni Odluke o minimalnim standardima za upravljanje tržišnim rizicima u bankama Sl. Glasnik RS 1/15-14

Regulatorna komisija za energetiku RS

- Odluka o visini naknade za podsticanje proizvodnje električne energije iz obnovljivih izvora i u efikasnoj kogeneraciji Sl. Glasnik RS 4/15-25
- Rješenje o utvrđivanju privremene regulatorne naknade za period 01.01.2015. - 31.03.2015. godine Sl. Glasnik RS 6/15-14
- Rješenje o utvrđivanju regulatorne naknade za 2015 godinu, broj: 01-169-1/15/R-103-40 Sl. glasnik RS 24/15-26

Centralna banka BiH

- Odluka o izmjenama Odluke o utvrđivanju i održavanju obaveznih rezervi i utvrđivanju naknade za iznos rezerve Sl. Glasnik RS 29/15-38

Agencija za osiguranje RS

- Pravilnik o postupanju društva za osiguranje u vezi sa pritužbama Sl. Glasnik RS 10/15-20
- "GAS PROMET" AD ISTOČNO SARAJEVO – PALE
- Cijena za operatera transportnog sistema prirodnog plina u Republici Srpskoj Sl. glasnik RS 22/15-13

SLUŽBENE NOVINE FEDERACIJE BOSNE I HERCEGOVINE

Federalno ministarstvo energije, rudarstva i industrije

- Pravilnik o utvrđivanju ispunjavanja uslova za obavljanje periodičnih pregleda, mjerenja i ispitivanja elektroenergetskim postrojenjima, električnim uređajima, električnim instalacijama i idavanju isprava Sl. novine FBiH 18/15-15

Federalno ministarstvo pravde

- Pravilnik o visini nagrade i naknade troškova notara kao povjerenika suda u

ostavinskom postupku Sl. novine FBiH 23/15-14

Državna regulatorna komisija za električnu energiju - DERK

- Odluka o izmjenama Odluke o izdavanju licence Sl. novine FBiH 2/15 -260
- Odluka o odobravanju Plana investicija za 2015. godinu Sl. novine FBiH 2/15 -261

Centralna banka Bosne i Hercegovine

- Uputstvo za rad po računu rezervi komercijalnih banaka Sl. novine FBiH 4/15-32

Agencija za nadzor osiguranja BiH

- Pravilnik o izmjeni i dopuni Pravilnika o evidenciji od-

štetnih zahtjeva neživotnih osiguranja Sl. novine FBiH 19/15-7

Sarajevska berza/burza vrijednosnih papira d.d. Sarajevo

- Statut "Sarajevske berze - burze vrijednosnih papira" d.d. Sarajevo Sl. novine FBiH 22/15-15

Agencija za bankarstvo FBiH

- Odluka o postupanju banke sa neaktivnim računima Sl. novine FBiH 30/15-25
- Uputstvo o izmjenama i dopunama Uputstva za licenciranje i druge saglasnosti Agencije za bankarstvo FBiH Sl. novine FBiH 30/15-29

DELOITTE PORESKE NOVOSTI

Uputstvo o uslovima i postupku davanja mišljenja Uprave za indirektno oporezivanje BiH

Uputstvo je 24. marta 2015. godine objavljeno u "Službenom glasniku BiH", broj: 25/15, a stupilo je na snagu 1. aprila 2015. godine.

Ukoliko Uprava za indirektno oporezivanje BiH ("UIO") u postupku registracije utvrdi da je za registraciju obveznika indirektnih poreza potrebna mjera osiguranja, UIO od podnosioca zahtjeva za registraciju može zahtijevati bankovnu garanciju.

Ukoliko podnosilac zahtjeva nije u mogućnosti da istu podnese, može predložiti polaganje gotovinskog depozita.

Uputstvo o uslovima i postupku davanja mišljenja Uprave za indirektno oporezivanje BiH

Uputstvo o uslovima i postupku davanja mišljenja Uprave za indirektno oporezivanje objavljeno je u "Službenom glasniku BiH", broj: 21/15 od

10.03.2015. godine, a stupilo je na snagu 18.03.2015. godine.

Uputstvo se ne primjenjuje na postupak davanja obvezujućih informacija koje izdaje nadležna organizaciona jedinica Sektora za carine, kao ni na postupak davanje obavještenja koje izdaje Odjeljenje za komunikacije i međunarodnu saradnju - Grupa za informisanje obveznika.

Zahtjev za mišljenje se podnosi Upravi za indirektno oporezivanje - Odjeljenju za pravne poslove - Grupi za izradu obvezujućih mišljenja iz oblasti indirektnih poreza.

Uslovi za podnošenje zahtjeva za mišljenje nisu pretrpjeli značajne izmjene, a rok za izdavanje mišljenja je ostao 30 dana. Uputstvom je propisano podnošenje zahtjeva putem obrasca "ZM" koji čini sastavni dio Uputstva, a uz njega se prilaže postavljeno pitanje, relevantna dokumentacija u vezi s njim te dokaz o uplati administrativne takse. Obrazac "ZM" popunjava podnosilac zahtjeva - poreski obveznik registrovan kod UIO.

Pravilnik o izmjenama i dopunama Pravilnika o dodjeljivanju identifikacionih brojeva i poreznoj registraciji poreznih obveznika na teritoriji Federacije Bosne i Hercegovine

U Službenim novinama FBiH, br. 104/14 od dana 24.12.2014. godine, objavljen je Pravilnik o izmjenama i dopunama Pravilnika o dodjeljivanju identifikacionih brojeva i poreznoj registraciji poreznih obveznika na teritoriji Federacije Bosne i Hercegovine (u nastavku "Pravilnik"). Izmjene i dopune Pravilnika stupile su na snagu dana 25.12.2014. godine.

- Izmjene i dopune Pravilnika omogućile su poreznu registraciju, tj. dodjelu poreznih brojeva poslovnim jedinicama nerezidenta, pri čemu se pod poslovnom jedinicom nerezidenta podrazumijeva: stalno mjesto poslovanja preko kojeg nerezident obavlja stalnu djelatnost u cijelosti ili djelimično na teritoriji FBiH;
- Podružnica stranog pravnog lica registrovana u FBiH.


*Zakoni i podzakonski akti od relevantnog značaja za strane investitore u BiH za period januar - juni 2015.

BIH EKONOMSKI UPDATE: Brojke iz marta ukazuju na ekonomski oporavak

Prvi makroekonomski indikatori za mart 2015. godine su ukazali na to da je BiH ekonomija na putu oporavka, nakon slabe ekonomske izvedbe u prva dva mjeseca 2015. godine.

- U martu 2015. godine izvoz roba se povećao za 2.7% na godišnjoj osnovi (6,4% na godišnjoj osnovi u februaru 2015. godine), dok je izvoz roba oborio dvomjesečni negativni trend i porastao za 1,4% u odnosu na isti mjesec 2014. godine.
- Ukupna industrijska proizvodnja u martu 2015. godine prekinula je četveromjesečni negativni trend sa zabilježenom ekspanzijom od 0,4% u odnosu na isti mjesec 2014. godine. Porast industrijske proizvodnje potaknut je pozitivnim rezultatima u dvije kategorije: proizvodnja (2,0% na godišnjoj osnovi) i opskrba strujom, gasom, parom, te klimatizacija (0,9% na godišnjoj razini).
- Maloprodajna prodaja u BiH je porasla za 6,0% na godišnjoj razini u martu 2015. godine, obilježavajući deseti mjesec uzastopnog rasta.

Trade balance of B&H



Do sada je rast maloprodajne prodaje bio podržan samo dobrom prodajom neprehrambenih proizvoda, dok je u martu 2015. godine dobar rezultat ostvarila i prodaja prehrambenih proizvoda – po prvi put od kraja 2013. godine.

- U martu 2015. godine indeks potrošačkih cijena (CPI) smanjio se za 0,2% na godišnjoj razini, obilježavajući četvrti mjesec uzastopnog pada CPI-a, ali i najnižu stopu deflacije u

istom periodu.

- Prosječna neto plaća je u martu 2015. godine porasla za 0,8% na godišnjoj razini, što je prva pozitivna stopa rasta u ovoj godini.


Misija Međunarodnog monetarnog fonda (MMF) na čelu s Ron van Rooden, posjetila je Banja Luku u periodu između 28. aprila i 12. maja s ciljem obavljanja savjetodavnih razgovora o članu IV. Uskoro je očekivan povratak misije u BiH kako bi obavili detaljniju diskusiju o potencijalnim nasljednicima. ■

EKONOMSKI FOKUS: Trgovinska bilanca u prvom kvartalu 2015. godine

U prvom kvartalu 2015. godine izvoz roba bilježi porast od 2,7%, u odnosu na isti kvartal 2014. godine, dostižući vrijednost od 2,12 milijardi KM. Uvoz roba u prvom kvartalu 2015. godine iznosio je 3,56 milijardi KM, što predstavlja pad za 1,9% u odnosu na prvi kvartal 2014. godine.

- Posmatrajući detaljnije strukturu izvoza roba, važno je naglasiti da od 22 izvozne kategorije, koje prati državna Agencija za statistiku, samo u 9 kategorija je zabilježen pad, u odnosu na prvi kvartal 2014. godine.

Import of goods in Q1 2015



EKONOMSKI PREGLED ZA BiH

Najveći pad je zabilježen u kategoriji mineralnih proizvoda (-18,0% na godišnjoj razini). S druge strane, 13 izvoznih kategorija je u prvom kvartalu 2015. godine zabilježilo rast, a najveći doprinos kvartalnom porastu izvoza robe dolazi od običnih metala (5,5% na godišnjoj razini), proizvodnje tekstila (18,3% na godišnjoj razini) i hemijskih proizvoda (13,5% na godišnjoj razini).

- Posmatrajući strukturu uvoza roba očitavanja su negativ-

na samo u 5 kategorija. Međutim, jaki pad mineralnih proizvoda (najveća kategorija uvoza roba) od 25,8% na godišnjoj razini gurnuo je ukupni uvoz roba u prvom kvartalu 2015. godine u negativnu zonu.

Slijedom toga, trgovinski deficit u prvom kvartalu 2015. godine iznosio je 1,44 milijarde KM (-7,8% na godišnjoj razini), dok je pokrivenosti izvozom/uvozom iznosila 59,5%.

Također je potrebno naglasiti da BiH bilježi suficit u samo 6 kategorija, a najveći sufi-

cit se odnosi na osnovne metale (87 milijuna KM) i drvnu industriju (82 milijuna KM). Evropska unija (EU) ostaje najveći trgovinski partner Bosne i Hercegovine s 71,6% udjelom u ukupnom izvozu i 59,5% u ukupnom uvozu roba.

Također, potrebno je napomenuti da od svih zemalja EU-e, BiH bilježi suficit u trgovanju sa samo jednom zemljom: Austrijom (37,3 milijuna KM). Izvan granica EU, najvažniji strani trgovinski partner Bosne i Hercegovine je Srbija sa 9,4% izvoza i 10,1% uvoza roba. ■

Bosna i Hercegovina	2009	2010	2011	2012	2013	2014e	2015f	2016f
Nominalni BDP (EUR mlrd)	12,4	12,7	13,2	13,2	13,4	13,6	14,2	14,9
Realni BDP (% na godišnjoj razini)	-2,7	0,8	1,0	-1,2	2,5	0,5	2,5	3,0
BDP po stanovniku (EUR)	3236	3312	3430	3426	3547	3574	3735	3936
BDP po stanovniku (EUR po paritetu kupovne moći)	6400	6500	7000	7100	7200	7200	7300	7400
Potrošnja po kućanstvu (realno, % na godišnjoj razini)	-4,6	0,1	0,0	-0,3	0,3	1,2	2,0	3,0
Bruto investicije u fiksni kapital (stvarni% na godišnjoj razini)	-28,8	-15,9	15,8	3,5	-3,0	4,0	6,0	5,0
Industrijska proizvodnja (% na godišnjoj razini)	-3,3	1,6	5,6	-5,2	6,7	0,1	5,0	6,0
Proizvođačke cijene (prosj,% na godišnjoj razini)	-3,2	0,9	3,7	1,9	-1,8	0,0	1,0	2,0
Potrošačke cijene (prosj,% na godišnjoj razini)	-0,4	2,1	3,7	2,1	-0,1	0,9	1,5	2,5
Prosječne bruto plaće (LCY,% na godišnjoj razini)	9,2	2,4	6,8	2,2	-0,5	0,3	3,0	5,0
Stopa nezaposlenosti (prosj,%)	24,1	27,2	27,6	28,0	27,5	27,5	26,5	24,0
Opći proračunski saldo (% BDP)	-4,4	-2,5	-1,3	-2,0	-2,2	-3,8	-2,5	-2,0
Javni dug (u% BDP)	35,1	38,3	38,9	39,7	41,5	45,0	44,6	42,5
Trgovinska bilanca (% BDP)	-28,1	-26,2	-28,3	-28,7	-25,8	-28,4	-28,5	28,2
Tekući račun platne bilance (% BDP)	-6,5	-6,1	-9,7	-9,3	-6,0	-7,9	-8,5	-7,4
Neto inozemna izravna ulaganja (% BDP)	1,4	2,1	2,6	2,1	1,9	3,0	4,2	3,4
Službene devizne rezerve (EUR mlrd)	3,2	3,3	3,3	3,3	3,6	3,9	4,1	4,3
Bruto inozemni dug (% BDP)	53,5	57,3	66,8	63,1	62,5	65,4	63,6	58,3
EUR / LCY (prosj)	1,96	1,96	1,96	1,96	1,96	1,96	1,96	1,96
USD / LCY (prosj)	1,40	1,47	1,41	1,52	1,47	1,48	1,70	1,70

Izvor: Raiffeisen ekonomski i finansijski pregled - Juni 2015.

DOGAĐAJI SA PRISUSTVOM ČLANOVA VSI/SSI

Događaji s prisustvom VSI od januara do juna 2015. godine	Sadržaj	Mjesto i vrijeme
NERP radionica- OECD i MVTEO	FIC članovi su učestvovali u izradi strategije OECD-a na temu: "Identifikacija reformskih prioriteta ekonomskog razvoja BiH"	Sarajevo, januar 2015. godine
"25 godina tranzicije u BiH" MMF, SST i CCI	Okrugli sto na temu prioriternih reformi razvoja sa osvrtom na tranziciju u BiH – FIC ED dio panela	Sarajevo, januar 2015. godine
Sastanak DEPO, BSA i AmCham	Organizacioni sastanak za potrebe prvog IT foruma u saradnji sa AmCham BiH	Sarajevo, januar 2015. godine
Aktivnost od strane Wolf Theiss i FIC	Organizacioni sastanak na temu zaštita potrošača i velikih stranih proizvođača i distributera goriva i tečnih naftnih derivata u BiH	Sarajevo, januar 2015. godine
Ad hoc preporuka od strane člana Raiffeisen Bank BiH	Izmjena Zakona o bankama u FBiH i RS – konzultativni sastanak	Sarajevo, januar 2015. godine
USAID EIA sastanak	Novi projekat USAID EIA za investiranje u sektor energije predstavio se predstavnicima FIC-a.	Sarajevo, januar 2015. godine
Predstavnik FIC BoD gost na TV HAYAT	Valentin Ilievski gost na TV HAYAT o Bijeloj knjizi i našim članovima	Sarajevo, januar 2015. godine
IOM izvještaj o mobilnosti radne snage u jugoistočnoj Europi	Članovi VSI dali svoje komentare na ovaj važni dokument	Sarajevo, januar 2015. godine
FIC BiH BoD član sastanak sa FIC Makedonije	FIC BoD član Sandra Kasalo Fazlić se sastala sa Vlatkom Stojanovskim direktorom FIC Makedonija gdje su razgovarali o budućim zajedničkim aktivnostima	Sarajevo, januar 2015. godine
FIC Predsjednik dao intervju za AlJazeera Balkans	Muidža je razgovarao o investicijama, prilikama i problemima u BiH	Sarajevo, januar 2015. godine
Sastanak FIC UO BiH	FIC BiH UO je održao svoj prvi sastanak u novom mandatu gdje se raspravljalo o aktivnostima za prvu polovinu 2015. godine	Sarajevo, januar 2015. godine
AHK seminar Transferne cijene u BiH	FIC predstavnici učestvovali na Seminaru	Sarajevo, februar 2015. godine
Sastanak FIC predstavnika sa UINO BiH	Sastanak je održan sa ciljem da se riješi problem za izvoznike po osnovu novog Uputstva o pojednostavljenom carinskom postupku	Banja Luka, februar 2015. godine
Sastanak sa zamjenikom šefa misije Holandske Vlade u BiH	FIC ED se sastao sa gđom. Lammerts zamjenicom šefa misije Holandske vlade u BiH i razgovarale su o razvoju SME's i dolasku novih investicija u BiH, te poslovnom okruženju	Sarajevo, februar 2015. godine
Sastanak sa HE Ambasadorom Austrije, Martinom Pammerom	FIC ED sastala se sa ambasadorom Austrije, gdje su razgovarali o položaju investitora sa akcentom na austrijske investitore, obzirom da us oni top ulagač u BiH, te novim prilikama u industriji za ulaganja	Sarajevo, februar 2015. godine
Konferencija na temu: Competiton Law organizovana od strane K&N	FIC član Karanovic & Nikolic organizovao konferenciju na temu: Competiton Law, gdje su članovi FIC-a dali svoj doprinos	Sarajevo, februar 2015. godine
Sastanak sa Ambasadorom Belgije i Visokim izaslanikom za EU u BiH	FIC ED se sastao sa Ambasadorom Belgije i Visokim izaslanikom EU za ekonomske odnose, FIPA predstavnicima i VTK Predstavnicima da bi razgovarali o mehanizmu koordinacije institucija, imidžu BiH i promociji izvoza roba i usluga iz BiH	Sarajevo, februar 2015. godine

DOGAĐAJI SA PRISUSTVOM ČLANOVA VSI/SSI

Događaji s prisustvom VSI od januara do juna 2015. godine	Sadržaj	Mjesto i vrijeme
EBRD promovisao novi projekat - Žene u biznisu	FIC član EBRD promovisao novi projekat gdje su učestvovali i FIC članovi, UniCredit banka FIC član	Banja Luka februar, 2015. godine
Sastanak EU i FIC – Naftni tečni derivati	Sastanak je održan sa ciljem da EU Delegacija pruži podršku aktivnostima na temu propisi o korištenju tečnih naftnih derivata u FBiH	Sarajevo, februar 2015. godine
EBRD tranzicioni izvještaj - prezentacija	Član FIC BiH, EBRD je prezentirao svoje Izvještaj o tranziciji za 2014. godinu	Sarajevo i Banja Luka, februar 2015. godine
Sastanak BIT Alijansa	FIC ED se sastala sa predstavnicima BIT alijanse i MarketMakers za zapošljavanje kako bi razgovarali o važnosti podrške malim poduzetnicima i razvoju IT-a u BiH	Sarajevo, februar 2015. godine
Sastanak FIC kompanija izvoznika	Sastanak je održan u Zenici sa ciljem da se targetiraju konkretni problemi izvoznika/FIC članica sa ciljem da se otklone preporuke u sferi carinjenja odrađenih proizvoda	Zenica, februar 2015. godine
Okrugli sto: "Konkurentnost jedinica lokalne samouprave – kako do investicija"	Vlada RS održala je sastanaka na temu konkurentnosti lokalni jedinica i kako podržati investicije kroz ove institucije. FIC članovi prisustvovali ovom događaju	Banja Luka, mart 2015. godine
CPU – okrugli stol na temu nesuklađenost propisa i poresko zakonodavstvo u BiH	Predsjednik FIC-a učestvovao je kao panelista na temu Preporuke iz Bijele knjige koje se odnose na harmonizaciju zakonodavstva sa akcentom na poreske propise iz oblasti doprinosa, naknada i poreza na dobit	Sarajevo, mart 2015. godine
Sastanak Ministarstvo finansija FBiH i MMF sa predstavnicima FIC-a	Predsjednik FIC-a sastao se sa predstavnicima Min. finansija FBiH i MMF misje sa ciljem diskusije i poreskom pravnom okviru i simulaciji investitora kroz poreske olakšice u FBiH	Sarajevo, mart 2015. godine
Sastanak sa šeficom kabineta Predsjedavajućeg Vijeća ministara BiH	Sastanak je održan sa ciljem da se Ured Predsjedavajućeg VM upozna sa radom i aktivnostima VSI	Sarajevo, mart 2015. godine
Sastanak s predstavnicima Općine Tuzla, Min. poduzetništva Tuzlanskog kantona i FIC članicama sa područja TK	Sastanak je održan sa ciljem da se pruži podrška privrednicima FIC članicama na TK i priprema za nastup na Sajmu privrednika u Gračanici	Sarajevo, mart 2015. godine
Sastanak sa projektom USAID FAR	Sastanak je održan sa predstavnicima FIC i USAID FAR projekta koji tretira fiskalnu reformu u BiH	Sarajevo, mart 2015. godine
Radni sastanak FIC članova i Min energetike i rudarstva na temu: Pravni okvir o naftnim tečnim derivatima u FBiH	Sastanak je organizovan od strane VSI kako bi se diskutovalo o pravnom okviru koji važi u FBiH a tiče se proizvođača ulja i naftnih tečnih derivata	Sarajevo, mart 2015. godine
FIC Business Barometar	FIC i SIDA USAID GOLD projekat pokrenuli su zajedničku inicijativu prikupljanja statistika i podataka o stranim ulaganjima (FIC članica) koje će se periodično objavljivati sa namjerom da se ukaže vladama na postotke zadovoljstva, potreba za izmjenama, namjerama prisutnih investitora o reinvesticijama i zapošljavanju	Sarajevo, mart 2015. godine
FIPA sjednica Upravnog odbora	Održana sjednica UO FIPA	Sarajevo, mart 2015. godine
Sastanak sa predstavnicima BBI biznis foruma	Sastanak je održan sa ciljem uspostave saradnje FIC BiH i BBI Sarajevo biznis foruma	Sarajevo, mart 2015. godine

 DOGAĐAJI SA PRISUSTVOM ČLANOVA VSI/SSI

Događaji s prisustvom VSI od januara do juna 2015. godine	Sadržaj	Mjesto i vrijeme
Sastanak sa BISNODE	FIC ED se sastala sa direktoricom BISNODE slovenačke kompanije koja se bavi povezivanjem kompanija i tržišta rada, analitikama, i položajem stranih kompanija – dogovorena saradnja sa FIC i BISNODE	Sarajevo, mart 2015. godine
UNCTAD i FIPA radionica	Nova strategija za izmjenu i reforme legislative koja se tiče dotoka stranih investicija u BiH održana je u Sarajevu. FIC ED je govorila u ime članica kompanija	Sarajevo, mart 2015. godine
AMCHAM i FIC - ITC Otvoreni forum	FIC i AMCHAM su zajednički organizovali prvi otvoreni IT forum u Banja Luci gdje su predstavnici IT kompanija i institucija razgovarali o propisima iz ove oblasti	Banja Luka, april 2015. godine
Konsultacije na temu: Izvještaj o napretku EU u BiH	FIC članice aktivni sudionici konsultacija na temu Izvještaj o napretku EU koji su dali svoje inpute	Sarajevo, april 2015. godine
VSI inicijativa na temu reformski propisi iz oblasti poreza RS	FIC komitet za poreze uputio je dopis ministarstvu finansija u RS na temu reforma poreskih propisa sa akcentom na Zakon o porezu na dobit	Sarajevo, april 2015. godine
Učešće FIC ED na sajmu u Gračanici	FIC ED je predstavio Vijeće stranih investitora kao i preporuke iz Bijele knjige na sajmu Gračanica "GRAPOS EXPO"	Sarajevo, april 2015. godine
UK Business club event	FIC ED je predstavila aktivnosti Vijeća stranih investitora na prijemu povodom britanskog poslovnog kluba	Sarajevo, april 2015. godine
Sastanak sa predstavnikom ekonomske diplomatije EU za BiH, Alanom Richardom	FIC ED je prisustvovala sastanku gdje se razgovaralo o imidžu BiH i ekonomskoj diplomatiji.	Sarajevo, april 2015. godine
Borba protiv sive ekonomije – preduvjet za strane investicije u SEE	FIC i RCC regionalna konferencija koja je okupila 7 ekonomija regije ministre, direktore poreskih i carinskih uprava gdje se razgovaralo o budućim aktivnostima vlada na suzbijanju sive ekonomije u regiji	Sarajevo, april 2015. godine
BBI Sarajevo Biznis Forum	FIC je podržao organizaciju Sarajevo biznis foruma, te učestvovao kao izlagač na sajmu investicija	Sarajevo, maj 2015. godine
BOSCH BOGD 2015	Članica FIC BOSCH je organizovao Dane otvorenih vrata u Međugorju gdje je FIC ED imao prezentaciju kompanijama o prilikama za strana ulaganja u BiH	Mostar, maj 2015. godine
Međunarodna konferencija o propisima i uticaju na investicije	FIC Predsjednik i FIC ED su izlagali na seminaru organizovanom od strane REVICON gdje se diskutovalo o primjeni pravnih propisa za investitore	Neum, maj 2015. godine
FIPA izbor investitora 2014 u BiH	FIC ED je učestvovala na izboru investitora za 2014 u BiH	Sarajevo, maj 2015. godine



VSI Članovi



CMS Reich-Rohrwig Hainz



karanovic/nikolic



MARIĆ & Co



WOLF THEISS

